

**ЎЗБЕКИСТОН РЕСПУБЛИКАСИ**  
**ҚОНУН ҲУЖЖАТЛАРИ**  
**ТЎПЛАМИ**

**15-сон**  
**(99)**  
**2004 й.**  
**апрель**

---

*Ўзбекистон Республикаси Қонун ҳужжатлари тўплами беш бўлимдан иборат:*

*тўпламнинг биринчи бўлимида Ўзбекистон Республикаси қонунлари ва Олий Мажлиснинг қарорлари эълон қилинади;*

*иккинчи бўлимда Ўзбекистон Республикаси Президентининг фармон ва фармойишлари эълон қилинади;*

*учинчи бўлимда Вазирлар Маҳкамасининг қарор ва фармойишлари эълон қилинади;*

*тўртинчи бўлимда Ўзбекистон Республикаси Конституциявий судининг қарорлари эълон қилинади;*

*тўпламнинг бешинчи бўлимида вазирликлар, давлат қўмиталари ва идораларининг Ўзбекистон Республикаси Адлия вазирлигида давлат рўйхатидан ўтказилган норматив-ҳуқуқий ҳужжатлари эълон қилинади.*

**МУНДАРИЖА**

*Учинчи бўлим*

177. «Қурилиш соҳасида ислоҳотларнинг амалга оширилиши мониторинги ва фаолиятни лицензиялаш бўйича Республика комиссияси таркибини тасдиқлаш тўғрисида» Ўзбекистон Республикаси Вазирлар Маҳкамасининг 2004 йил 14 апрелдаги 181-сон қарори
178. «Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси фаолиятини ташкил этиш тўғрисида» Ўзбекистон Республикаси Вазирлар Маҳкамасининг 2004 йил 14 апрелдаги 182-сон қарори
179. «Ўзбекистон Республикасининг гидрометеорология хизматини такомиллаштириш тўғрисида» Ўзбекистон Республикаси Вазирлар Маҳкамасининг 2004 йил 14 апрелдаги 183-сон қарори

*Бешинчи бўлим*

180. «Давлат улушини бошқариш бўйича кўрсатилган хизматлар учун тўловларни амалга ошириш тартиби тўғрисидаги низомга ўзгартириш ва қўшимчалар кириштириш ҳақида» Ўзбекистон Республикаси Молия вазирлиги, Давлат мулкни

бошқариш ва тадбиркорликни қўллаб-қувватлаш давлат қўмитасининг 2004 йил 4 мартдаги 38, 01/06-04-сон қарори. (*Ўзбекистон Республикаси Адлия вазирлиги томонидан 2004 йил 12 апрелда 1262-1-сон билан давлат рўйхатидан ўтказилди*)

181. «Накд чет эл валютасида операцияларни амалга ошириш қоидаларига ўзгартириш ва қўшимчалар киритиш тўғрисида» Ўзбекистон Республикаси Марказий банки Бошқарувининг 2004 йил 21 февралдаги 474-1-сон қарори. (*Ўзбекистон Республикаси Адлия вазирлиги томонидан 2004 йил 15 апрелда 957-1-сон билан давлат рўйхатидан ўтказилди*)

182. «Тижорат банклари томонидан фермер хўжаликларига бўлғуси ҳосилни гаровга олган ҳолда кредит бериш тартиби тўғрисида низомни тасдиқлаш ҳақида» Ўзбекистон Республикаси Марказий банки Бошқарувининг 2004 йил 1 мартдаги 563-сон қарори. (*Ўзбекистон Республикаси Адлия вазирлиги томонидан 2004 йил 16 апрелда 1337-сон билан давлат рўйхатидан ўтказилди*)

183. «Суғурталовчининг ижро этувчи органи раҳбарига ва бош бухгалтерига қўйиладиган малака талаблари тўғрисидаги низомни тасдиқлаш ҳақида» Ўзбекистон Республикаси Молия вазирининг 2004 йил 25 мартдаги 52-сон буйруғи. (*Ўзбекистон Республикаси Адлия вазирлиги томонидан 2004 йил 16 апрелда 1338-сон билан давлат рўйхатидан ўтказилди*)

184. «Олий таълим муассасалари талабаларига стипендиялар тайинлаш ва тўлаш тартиби тўғрисидаги йўриқномани тасдиқлаш ҳақида» Ўзбекистон Республикаси Олий ва ўрта махсус таълим вазирлиги, Молия вазирлигининг 2004 йил 10 мартдаги 2-П, 43-сон қарори. (*Ўзбекистон Республикаси Адлия вазирлиги томонидан 2004 йил 16 апрелда 1339-сон билан давлат рўйхатидан ўтказилди*)

Вазирликлар, давлат қўмиталари ва идораларининг умумий мажбурий тусдаги меъёрий ҳужжатларини давлат рўйхатидан ўтказиш ҳолати тўғрисида 2004 йил 10 апрелдан 16 апрелгача бўлган маълумот

## УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

### **177** Қурилиш соҳасида ислоҳотларнинг амалга оширилиши мониторинги ва фаолиятни лицензиялаш бўйича Республика комиссияси таркибини тасдиқлаш тўғрисида

Капитал қурилишда бозор принципларининг яхлит тизмини жорий этиш ҳамда Ўзбекистон Республикаси Президентининг «Капитал қурилишда иқтисодий ислоҳотларни янада чуқурлаштиришнинг асосий йўналишлари тўғрисида» 2003 йил 6 майдаги ПФ–3240-сон Фармонида ва Ҳукуматнинг капитал қурилишда ислоҳотларга доир кейинги қарорларида белгиланган капитал қурилишда янги хўжалик муносабатларига самарали ўтишни таъминлаш мақсадида Вазирлар Маҳкамаси **қарор қилади:**

1. Қуйидагилар:

Қурилиш соҳасида ислоҳотларнинг амалга оширилиши мониторинги ва фаолиятни лицензиялаш бўйича Республика комиссияси таркиби 1-иловага\* мувофиқ;

Қурилиш соҳасида ислоҳотларнинг амалга оширилиши мониторинги ва фаолиятни лицензиялаш бўйича Республика комиссияси тўғрисидаги низом 2-иловага мувофиқ тасдиқлансин.

2. Қуйидагилар Қурилиш соҳасида ислоҳотларнинг амалга оширилиши мониторинги ва фаолиятни лицензиялаш бўйича Республика комиссиясининг асосий вазифалари этиб белгилансин:

капитал қурилишда иқтисодий ислоҳотларнинг амалга оширилиши, ислоҳотларни чуқурлаштиришга доир қабул қилинган қонун ҳужжатлари ва норматив ҳужжатларнинг ўз вақтида ва тўлиқ бажарилиши, пудрат ва лойиҳалаш ишлари бозорининг шакллантирилиши бўйича доимий мониторингни амалга ошириш;

бозор принциплари ва механизмларини капитал қурилишда бошқарув, нарх белгилаш ва хўжалик муносабатлари тизимига кенг жорий қилишни, лойиҳалаш ва қурилиш ишларини бажаришга буюртмаларни жойлаштиришда танлов савдолари (тендерлар) ташкил этиш даражасини оширишни, пудрат шартномалари ролини кучайтиришни ҳамда уларнинг ижроси юзасидан буюртмачилар ва пудратчиларнинг жавобгарлигини оширишни, қурилишда лойиҳа, смета ва технология интизомини мустаҳкамлашни таъминлаш;

қурилишни ташкил этишнинг асосий шакли сифатида, қурилишда объектларни фойдаланишга тайёр ҳолда барпо этишга ўтиш, марказлаштирилган манбалар ҳисобига амалга ошириладиган объектлар қурилишини ташкил этиш ва молиялаштириш тизимини янада такомиллаштириш бўйича чора-тадбирлар комплексини амалга ошириш;

лойиҳалаш ва пудрат қурилиш ташкилотларини давлат тасарруфидан чиқариш ва хусусийлаштириш жараёнларини тугаллаш, улар негизида асосан хусусий ва қўшма корхоналар ташкил этиш, лойиҳалаш ва пудрат ишлари бозорида рақобат

---

\* 1-илова берилмайди.

муҳитини шакллантиришни давом эттириш бўйича таклифлар ишлаб чиқиш юзасидан мониторинг ўрнатиш;

Капитал қурилишда нарх белгилашнинг смета-норматив базасини такомиллаштириш ва янгилаш дастурининг ўз вақтида амалга оширилиши, янги ишлаб чиқилган смета-норматив ҳужжатларни қурилиш жараёни қатнашчиларига етказиш устидан таъсирчан назоратни амалга ошириш;

қурилиш материаллари бозорини янада кенгайтириш, қурилиш материаллари, конструкциялари ва буюмлари биржа савдосини ташкил этиш ва ривожлантириш тизимини такомиллаштириш бўйича таклифлар тайёрлаш;

қурилиш соҳасида фаолиятнинг айрим турларини амалга ошириш ҳуқуқига лицензиялар бериш, лицензияларнинг амал қилишини тўхтатиш ва лицензияларни бекор қилиш тўғрисида қарорлар қабул қилиш.

3. Вазирлар Маҳкамасининг «Иқтисодий ислохотларни чуқурлаштиришга доир қабул қилинган ҳужжатларнинг амалга оширилиши мониторинги бўйича Ҳукумат комиссиясини ташкил этиш тўғрисида» 2003 йил 19 июндаги 278-сон қарори билан тузилган Ҳукумат комиссиясининг капитал қурилишда иқтисодий ислохотларга доир вазифалари ва функциялари Қурилиш соҳасида ислохотларнинг амалга оширилиши мониторинги ва фаолиятни лицензиялаш бўйича Республика комиссиясига юклансин.

4. Ўзбекистон Республикаси Ҳукуматининг 3-иловага мувофиқ айрим қарорлари ўз кучини йўқотган деб ҳисоблансин ва баъзиларига ўзгартиришлар киритилсин.

5. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.Ф. Файзуллаев зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 14 апрель,  
181-сон

Вазирлар Маҳкамасининг  
2004 йил 14 апрелдаги 181-сон қарорига  
2-ИЛОВА

**Қурилиш соҳасида ислохотларнинг амалга оширилиши  
мониторинги ва фаолиятни лицензиялаш бўйича  
Республика комиссияси тўғрисида  
НИЗОМ**

**I. Умумий қоидалар**

1. Ушбу Низом Қурилиш соҳасида ислохотларнинг амалга оширилиши мониторинги ва фаолиятни лицензиялаш бўйича Республика комиссияси (кейинги ўринларда Комиссия деб аталади) фаолияти тартибини белгилайди.

2. Комиссия ўз фаолиятини қурилиш муносабатларини ислох қилишни таъминлашни ташкил этиш, қурилишда иқтисодий ислохотларнинг амалга оширилишини чуқур таҳлил қилиш, ислохотларни янада чуқурлаштириш бўйича ташаббус кўрса-тиш ва таклифлар тайёрлаш мақсадида амалга оширади.

3. Комиссия ўз фаолиятида Ўзбекистон Республикаси Конституциясига ва қонун-

ларига, Ўзбекистон Республикаси Президентининг фармонлари, қарорлари ва фармойишларига, Ҳукумат қарорларига ва ушбу Низомга амал қилади.

4. Комиссиянинг ўз ваколатлари доирасида қабул қилинган қарорлари давлат бошқаруви органларининг ва мулкчилик шаклларида қатъи назар, хўжалик юритувчи субъектларнинг бажариши учун мажбурий ҳисобланади.

5. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари ҳузурида қурилишда иқтисодий ислохотларни чуқурлаштириш бўйича ҳудудий комиссиялар (кейинги ўринларда ҳудудий комиссиялар деб аталади) фаолият кўрсатади.

6. Ҳудудий комиссияларнинг низомлари ва таркиблари Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари томонидан тасдиқланади.

## II. Комиссиянинг вазифалари ва фаолият йўналишлари

7. Қуйидагилар Комиссиянинг асосий вазифалари ва фаолият йўналишлари ҳисобланади:

Ўзбекистон Республикасининг Шаҳарсозлик кодексини ва қурилиш соҳасидаги бошқа қонун ҳужжатларини, Ўзбекистон Республикаси Президентининг «Капитал қурилишда иқтисодий ислохотларни янада чуқурлаштиришнинг асосий йўналишлари тўғрисида» 2003 йил 6 майдаги ПФ–3240-сон Фармонини ва Ҳукуматнинг қурилишда ислохотлар бўйича қарорларини, шунингдек капитал қурилишни ислох қилишга йўналтирилган бошқа норматив-ҳуқуқий ҳужжатларни бажаришни таъминлашга доир ишларни ташкил этиш;

қурилишда иқтисодий ислохотларни чуқурлаштириш бўйича Ўзбекистон Республикаси Президенти фармонларида ҳамда Ҳукумат қарорларида баён қилинган талаблар ва қоидаларнинг ўз вақтида, тўлиқ бажарилиши мониторингини мунтазам равишда амалга ошириш, қурилиш соҳасида ягона давлат сиёсати изчил амалга оширилишини таъминлаш;

бозор принциплари ва механизмларини капитал қурилишда бошқарув, нарх белгилаш ва хўжалик муносабатлари тизимига кенг жорий қилишни, лойиҳалаш ва қурилиш ишларини бажаришга буюртмаларни жойлаштиришда танлов савдолари (тендерлар) ташкил этиш даражасини оширишни, пудрат шартномалари ролини кучайтиришни ҳамда уларнинг ижроси юзасидан буюртмачилар ва пудратчиларнинг жавобгарлигини оширишни, қурилишда лойиҳа, смета ва технология интизомини мустаҳкамлашни таъминлаш;

қурилиш жараёни қатнашчиларининг жорий хўжалик фаолиятига маъмурий аралашувга йўл қўймаслик чора-тадбирларини амалга ошириш;

қурилиш соҳасидаги бошқарув органлари ташкилий тузилмасини хўжалик юритувнинг бозор шакллари талабларига мувофиқ такомиллаштиришга йўналтирилган чора-тадбирларни мунтазам равишда амалга ошириш;

лойиҳалаш ва пудрат қурилиш ташкилотларини давлат тасарруфидан чиқариш ва хусусийлаштириш жараёнларини тугаллаш, улар негизида асосан хусусий ва қўшма корхоналар ташкил этиш, лойиҳалаш ва пудрат ишлари бозорида рақобат муҳитини шакллантиришни давом эттириш бўйича таклифлар ишлаб чиқиш юзасидан мониторинг ўрнатиш;

қурилишни ташкил этишнинг асосий шакли сифатида, қурилишда объектларни фойдаланишга тайёр ҳолда барпо этишга ўтиш, марказлаштирилган манбалар ҳисобига амалга ошириладиган объектлар қурилишини ташкил этиш ва молиялаш-

тириш тизимини янада такомиллаштириш бўйича чора-тадбирлар комплексини амалга ошириш;

капитал қурилишда иқтисодий ислохотларнинг боришини акс эттирувчи кўрсаткичлар тизимининг ишлаб чиқиши ва жорий этилишини назорат қилиш;

Капитал қурилишда нарх белгилашнинг смета-норматив базасини такомиллаштириш ва янгилаш дастурининг ўз вақтида амалга оширилиши, янги ишлаб чиқилган смета-норматив ҳужжатларни қурилиш жараёни қатнашчиларига етказиш ус-тидан таъсирчан назоратни амалга ошириш;

капитал қурилиш соҳасидаги илмий-тадқиқот ишларининг аҳволини таҳлил қилиш, капитал қурилишни янада ислох қилиш масалаларини тартибга солувчи норматив-ҳуқуқий ҳужжатларнинг ижроси мониторингини олиб бориш, уларни қурилиш жараёни қатнашчиларига етказиш;

қурилиш материаллари бозорини янада кенгайтириш, қурилиш материаллари, конструкциялари ва буюмлари биржа савдосини ташкил этиш ва ривожлантириш тизимини такомиллаштириш бўйича таклифлар тайёрлаш;

қурилишдаги иқтисодий ислохотларни доимий равишда методик ва ҳуқуқий таъминлашни, қурилиш ва қурилиш бизнеси соҳасида хўжалик юрителикнинг замо-навий методларини эгаллаган кадрларни тайёрлаш ва уларнинг малакасини оши-риш ишларини ташкил этиш;

қурилиш соҳасида фаолиятнинг айрим турларини амалга ошириш ҳуқуқига лицензиялар бериш, лицензияларнинг амал қилишини тўхтатиш ва лицензияларни бекор қилиш тўғрисида қарорлар қабул қилиш.

### III. Комиссиянинг ҳуқуқлари

8. Комиссия қуйидаги ҳуқуқларга эга:

тегишли идоралар ва ташкилотлар, шунингдек ҳудудий комиссиялар раҳбар ходимларининг қурилишда иқтисодий ислохотларни чуқурлаштириш бўйича улар томонидан амалга оширилаётган ишлар тўғрисидаги ҳисоботларини эшитиш;

Вазирлар Маҳкамасига капитал қурилишда иқтисодий ислохотларни чуқурлаш-тиришга йўналтирилган норматив-ҳуқуқий ҳужжатларни такомиллаштириш бўйича таклифлар киритиш;

қурилишда иқтисодий ислохотларни чуқурлаштириш бўйича ҳудудий комиссия-лар фаолиятини мувофиқлаштириш;

Вазирлар Маҳкамасига паст рентабелли, зарар кўриб ишлаётган ва истикбол-сиз қурилиш ташкилотлари ва корхоналарини қайта ташкил этиш тўғрисида так-лифлар киритиш;

вазирликлар, идоралар ва хўжалик бирлашмаларидан Комиссияга юкланган вази-фаларнинг бажарилишини таъминлаш учун зарур ахборотларни сўраш;

тегишли вазирликлар ва идоралар, корхоналар ва ташкилотлар мутахассисла-рини, институтларнинг олимларини ҳамда қурилиш йўналишидаги олий ўқув юрт-лари ўқитувчиларини материаллар тайёрлаш учун жалб этиш;

жойларда қурилишда иқтисодий ислохотларни амалга ошириш учун масъул бўлган мансабдор шахсларнинг лавозими-га лойиқлигини ва амалий фаолияти нати-жаларини баҳолаш, ўз ваколатлари доирасида қурилиш комплексини юқори мала-кали мутахассислар билан мустаҳкамлашга доир чора-тадбирлар кўриш;

лицензияланган фаолият соҳасидаги қонун ҳужжатлари талаблари бузилиши-га йўл қўйган мансабдор шахсларга нисбатан белгиланган тартибда чоралар кўриш тўғрисида тегишли органларга таклифлар киритиш.

#### IV. Комиссия фаолиятини ташкил этиш

9. Комиссияга Вазирлар Маҳкамаси қарори билан тайинланадиган раис раҳбарлик қилади.

Комиссия раиси Комиссия ишларини бошқаради, мажлисларини олиб боради, мажлислар протоколларини, иш режаларини ва Комиссиянинг бошқа ҳужжатларини тасдиқлайди.

10. Комиссия мажлислари тасдиқланган иш режасига мувофиқ ҳар ойда камида бир марта ўтказилади. Комиссия раиси томонидан навбатдан ташқари мажлислар чақирилиши мумкин.

11. Комиссиянинг қўриб чиқиладиган масалалар бўйича қарори унинг учун Комиссия аъзолари оддий кўпчилиги овоз беришган тақдирда қабул қилинган ҳисобланади. Комиссиянинг ҳар бир аъзоси қабул қилинадиган қарорлар бўйича ёзма равишда ўз фикрини билдиришга ҳақлидир.

12. Комиссия раиси билан келишувга қўра Комиссиянинг объектив сабаблар билан мажлисда қатнашмаётган аъзолари ўрнига уларнинг ваколатли вакиллари мажлисда овоз бериш ҳуқуқисиз қатнашиши мумкин.

13. Комиссия раиси қарорларни тезкорлик билан қабул қилиш мақсадида Комиссия аъзолари билан келишилган айрим масалалар бўйича Комиссия қарорларини сўров йўли билан тасдиқлаши мумкин.

14. Зарурат бўлганда Комиссия мажлисига қўриб чиқиладиган масалалар хактерига қараб, вазирликлар ва идоралар, хўжалик бирлашмалари, жамоат ташкилотлари, корхоналар, муассасалар ва ташкилотлар раҳбарлари таклиф этилади.

15. Комиссия ҳар чоракда Вазирлар Маҳкамасига амалга оширилган ишлар тўғрисида ахборот тақдим этади.

#### V. Комиссия мажлисига материалларни тайёрлаш тартиби

16. Комиссия мажлисига материаллар ишчи органлар томонидан манфаатдор вазирликлар ва идоралар, маҳаллий давлат ҳокимияти органлари, шунингдек Комиссиянинг уларни тайёрлаш учун масъул бўлган аъзолари билан биргаликда Комиссиянинг иш режасига мувофиқ тайёрланади.

17. Комиссия мажлиси кун тартибининг ҳар бир масаласи бўйича ҳужжатлар пакетига Комиссия қарорини қабул қилиш учун зарур бўлган материаллар (таҳлилий маълумотномалар, жадваллар ва бошқалар) ҳамда Комиссия қарори лойиҳаси мавжуд бўлиши керак.

#### VI. Комиссиянинг ишчи органлари ва котиби

18. Қуйидагилар:

капитал қурилишда иқтисодий ислохотларнинг амалга оширилиши мониторинги бўйича — Ўзбекистон Республикаси Вазирлар Маҳкамаси, Иқтисодиёт вазирлиги, Молия вазирлиги, «Давархитектқурилиш» қўмитаси ва Давлат мулки қўмитасининг юқори малакали мутахассисларидан 5 кишидан иборат доимий ишлайдиган ишчи гуруҳ;

қурилиш соҳасидаги фаолиятни лицензиялаш бўйича — Ўзбекистон Республикаси Давлат архитектура ва қурилиш қўмитаси Комиссиянинг ишчи органлари ҳисобланади.



Капитал қурилишда иқтисодий ислохотларнинг амалга оширилиши мониторинги бўйича ишчи гуруҳнинг шахсий таркиби Комиссия томонидан тасдиқланади.

19. Комиссиянинг капитал қурилишда иқтисодий ислохотларнинг амалга оширилиши мониторинги бўйича ишчи органи:

Комиссиянинг навбатдаги давр учун иш режаси лойиҳасини тайёрлайди;

Комиссиянинг навбатдаги мажлисига барча зарур материалларни ўз вақтида тайёрлашни таъминлайди ва вазирликлар, идоралар, юридик шахслар бирлашмалари, маҳаллий давлат ҳокимияти органлари, тижорат банклари, корхоналар ҳамда Комиссия аъзоларидан зарур материалларни ва эксперт хулосаларни олиш ҳуқуқига эга;

кун тартибидаги масалалар бўйича таҳлилий материалларни тайёрлашни ва Комиссия мажлисларини ўтказишни ташкил қилади;

Комиссияга қурилишда иқтисодий ислохотларни чуқурлаштириш жараёнлари мониторинги бўйича ахборотлар ва таҳлилий материалларни кўриб чиқиш учун тақдим этади;

жойларга борган ҳолда ҳудудий комиссиялар фаолиятини ва Комиссиянинг қабул қилинган қарорлари бажарилишини ўрганади;

Комиссия аъзоларини ва таклиф этилган шахсларни, тегишли материалларни юборган ҳолда, мажлиснинг ўтказиладиган санаси, вақти, жойи тўғрисида хабардор қилади;

Комиссияга унинг қарорларига мувофиқ бошқа материалларни кўриб чиқиш учун тақдим этади.

20. Қурилиш соҳасидаги фаолиятни лицензиялаш бўйича ишчи орган Комиссия қарорларига мувофиқ лицензияларни расмийлаштиради, қайта расмийлаштиради, лицензия битимлари тузади, лицензиялар реестрини юритади, лицензиатлар томонидан лицензия талаблари ва шартларига риоя этилишини назорат қилади, қонун ҳужжатларида белгиланган тартибда лицензияларнинг амал қилишини тўхтатиб туради ва тиклайди.

21. Қурилиш соҳасидаги фаолиятни лицензиялаш бўйича ишчи орган ишлари Вазирлар Маҳкамасининг «Қурилиш соҳасидаги фаолиятни лицензиялаш тўғрисидаги низомларни тасдиқлаш ҳақида» 2003 йил 24 сентябрдаги 410-сон қарорига мувофиқ ташкил этилади.

22. Комиссия котиби:

ишчи органлар ишларига раҳбарлик қилади;

Комиссия қарорларининг ижроси мониторингини юритади ва унинг натижаларини Комиссия мажлисида кўриб чиқиш учун тақдим этади;

ишчи органларнинг Комиссия мажлисига материалларни тайёрлашга доир ишларини ташкил қилади;

Комиссия раиси билан мажлиснинг ўтказиладиган муддатлари ва жойини, шунингдек таклиф этиладиганлар контингентини келишиб олади;

Комиссия протоколларини расмийлаштиради ва тасдиқланган протоколларни Комиссия аъзоларига, манфаатдор вазирликлар, идоралар ва маҳаллий давлат ҳокимияти органларига юборади.



Вазирлар Маҳкамасининг  
2004 йил 14 апрелдаги 181-сон қарорига  
3-ИЛОВА

### **I. Ўзбекистон Республикаси Ҳукуматининг ўз кучини йўқотган қарорлари рўйхати**

1. Вазирлар Маҳкамасининг «Капитал қурилишни бошқариш тузилмасини янада қайта ташкил этиш чора-тадбирлари тўғрисида» 2000 йил 13 апрелдаги 144-сон қарорининг 2-банди.

2. Вазирлар Маҳкамасининг «Ўзбекистон Республикаси Президентининг фармонлари ва Ўзбекистон Республикаси Ҳукуматининг қарорлари билан ташкил этилган комиссиялар ва кенгашлар таркибини тасдиқлаш тўғрисида» 2000 йил 30 сентябрдаги 374-сон қарорига 23-илова.

### **II. Ўзбекистон Республикаси Ҳукуматининг айрим қарорларига киритилаётган ўзгартиришлар**

1. Вазирлар Маҳкамасининг «Қурилиш соҳасидаги фаолиятни лицензиялаш тўғрисидаги низомларни тасдиқлаш ҳақида» 2003 йил 24 сентябрдаги 410-сон қарорида (Ўзбекистон Республикаси ҚТ, 2003 й., 9-сон, 87-модда):

2-банд ва 7-илова ўз кучини йўқотган деб ҳисоблансин;

1—6-иловаларнинг 2-бандларидаги «Вазирлар Маҳкамасининг қурилиш соҳасидаги фаолиятни лицензиялаш комиссияси» сўзлари «Қурилиш соҳасида ислохотларнинг амалга оширилиши мониторинги ва фаолиятни лицензиялаш бўйича Республика комиссияси» сўзлари билан алмаштирилсин;

Қурилиш соҳасидаги фаолиятни лицензиялаш тўғрисидаги низомларга иловалар сифатида берилган схемалардаги «Вазирлар Маҳкамасининг қурилиш соҳасидаги фаолиятни лицензиялаш комиссияси» сўзлари «Қурилиш соҳасида ислохотларнинг амалга оширилиши мониторинги ва фаолиятни лицензиялаш бўйича Республика комиссияси» сўзлари билан алмаштирилсин.

2. Вазирлар Маҳкамасининг «Ўзбекистон Республикаси Вазирлар Маҳкамаси аппарати тузилмасига қисман ўзгартириш киритиш тўғрисида» 2003 йил 27 декабрдаги 574-сон қарорига 2-иловада:

илованинг номи қуйидаги таҳрирда баён қилинсин:

«Ўзбекистон Республикаси Бош вазирининг ўринбосари — Қурилиш, қурилиш материаллари саноати, коммунал хизмат кўрсатиш ва транспорт комплекси раҳбари аппарати тузилмаси»;

«Республика комиссияларига раҳбарлик қилиш» бўлимидаги учинчи ва тўртинчи хатбоши қуйидаги таҳрирда баён қилинсин:

«Қурилиш соҳасида ислохотларнинг амалга оширилиши мониторинги ва фаолиятни лицензиялаш бўйича Республика комиссияси».

ЎЗБЕКИСТОН RESPUBLIKACИ BAZИPЛAP MAХҚAMACИНИНГ ҚАРOPИ

## **178** Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси фаолиятини ташкил этиш тўғрисида

Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси ишларини ташкил этишни таъминлаш мақсадида Вазирлар Маҳкамаси **қарор қилади:**

1. Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси тўғрисидаги низом иловага мувофиқ тасдиқлансин.

2. Қорақалпоғистон Республикаси, вилоятлар ва Тошкент шаҳрида муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича минтақавий комиссиялар ташкил этилсин.

3. Белгилаб қўйилсинки:

Қорақалпоғистон Республикаси Вазирлар Кенгаши Раисининг, вилоятлар ва Тошкент шаҳар ҳокимларининг иқтисодиёт ва ижтимоий ривожлантириш масалалари бўйича ўринбосарлари минтақавий комиссияларнинг раислари ҳисобланади;

минтақавий комиссиялар таркиби Қорақалпоғистон Республикаси Вазирлар Кенгашининг Раиси, вилоятлар ва Тошкент шаҳар ҳокимлари билан келишган ҳолда Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси томонидан тасдиқланади.

4. Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси:

бир ой муддатда Муддатида тўланмаган тўловлар муддатини кечиктириш ва (ёки) уларни бўлиб-бўлиб тўлаш, пеня ҳисоблашни тўхтатиш, шунингдек солиқлар ҳамда бюджетга ва давлат мақсадли фондларига тўловлар бўйича пеняни ҳисобдан чиқариш тўғрисидаги низомга мазкур қарордан келиб чиқувчи ўзгартиришларни белгиланган тартибда киритсин;

муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича минтақавий комиссия тўғрисидаги низомни икки ҳафта муддатда ишлаб чиқсин ва тасдиқласин.

5. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосари Р.С. Азимов зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 14 апрель,  
182-сон

Вазирлар Маҳкамасининг  
2004 йил 14 апрелдаги 182-сон қарорига  
ИЛОВА

**Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси тўғрисида  
НИЗОМ**

**I. Умумий қоидалар**

1. Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси (кейинги ўринларда Комиссия деб аталади) Вазирлар Маҳкамасининг 2004 йил 9 февралдаги 61-сон қарорига мувофиқ ташкил этилган ва ўз фаолияти тўғрисида Ўзбекистон Республикаси Вазирлар Маҳкамасига ҳисоб беради.

2. Комиссия ўз фаолиятини тўловлар интизомини мустаҳкамлаш, муддати ўтказиб юборилган дебиторлик ва кредиторлик қарзларни қисқартириш бўйича чоратадбирлар комплексини ишлаб чиқиш ва амалга ошириш, хўжалик юритувчи субъектлар ўртасидаги тўловлар ва ҳисоб-китоблар тизимини такомиллаштириш, бюджетга ҳамда давлат мақсадли фондларига солиқлар ва мажбурий тўловларнинг ўз вақтида тушишини таъминлаш, бюджетга ҳамда давлат мақсадли фондларига қарзларни қисқартириш ва улар вужудга келишининг олдини олиш, кейинчалик ушбу чоратадбирларнинг бажарилишини назорат қилиш мақсадида амалга оширади.

3. Комиссия ўз фаолиятида Ўзбекистон Республикаси Конституциясига ва қонунларига, Ўзбекистон Республикаси Олий Мажлисининг қарорлари ва бошқа ҳужжатларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, шунингдек мазкур Низомга амал қилади.

4. Комиссиянинг ўз ваколатлари доирасида қабул қилинган қарорларининг вазирликлар, идоралар, маҳаллий давлат ҳокимияти ва бошқарув органлари, банклар, мулкчилик шаклларида қатъи назар, хўжалик юритувчи субъектлар ва уларнинг бирлашмалари, мансабдор шахслар ҳамда фуқаролар томонидан бажарилиши мажбурийдир.

5. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари ҳузурида Қорақалпоғистон Республикаси Вазирлар Кенгаши Раисининг, вилоятлар ва Тошкент шаҳар ҳокимларининг иқтисодиёт ва ижтимоий ривожлантириш масалалари бўйича ўринбосарлари бошчилик қиладиган муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича минтақавий комиссиялар ташкил этилади.

6. Минтақавий комиссиялар таркиблари Қорақалпоғистон Республикаси Вазирлар Кенгашининг Раиси, вилоятлар ва Тошкент шаҳар ҳокимлари билан келишган ҳолда Комиссия томонидан тасдиқланади.

**II. Комиссиянинг вазифалари**

7. Қуйидагилар Комиссиянинг асосий вазифалари ҳисобланади:  
иқтисодиёт тармоқлари ва секторларида ҳисоб-китоблар механизмини такомил-

лаштириш ҳамда барча хўжалик юритувчи субъектлар ҳамда банк ва молия муассасалари томонидан тўлов интизоми ва ҳисоб-китобларнинг ўз вақтида ўтказилиши, солиқлар ва мажбурий тўловларнинг тўлиқ тўланиши масалалари бўйича амалдаги қонун ҳужжатлари нормаларига қатъий риоя этилиши устидан таъсирчан назоратни таъминлаш;

хўжалик юритувчи субъектларнинг дебиторлик ва кредиторлик қарзлари ҳолатини таҳлил қилиш, корхоналар ва ташкилотларнинг муддати ўтказиб юборилган қарзлари таққосланишини мунтазам равишда ташкил этиш ҳамда уларни қисқартириш бўйича таъсирчан чора-тадбирларни ишлаб чиқиш ва кўриш;

хўжалик юритувчи субъектлар томонидан муддати ўтказиб юборилган дебиторлик қарзларнинг вужудга келишига йўл қўймаслик, айланма маблағлардан оқилона фойдаланиш, уларнинг сақланишини ва ўз вақтида тўлдирилишини таъминлаш бўйича Ўзбекистон Республикаси Президенти фармонлари ва Ҳукумат қарорларининг бажарилиши устидан назоратни амалга ошириш;

амалдаги қонун ҳужжатларига мувофиқ бюджетга ва давлат мақсадли фондларига солиқлар ва мажбурий тўловларнинг тўлиқ ундирилишини таъминлаш;

айрим хўжалик юритувчи субъектларнинг бюджетдан ва давлат мақсадли фондларидан қарзларини қисқартириш бўйича таклифлар ишлаб чиқиш ва чора-тадбирлар кўриш.

### III. Комиссиянинг ҳуқуқлари ва мажбуриятлари

8. Комиссия қуйидаги ҳуқуқларга эга:

вазирликлар, идоралар, банклар, солиқ ва молия органлари, хўжалик бошқаруви органлари, корхоналар, маҳаллий давлат бошқарув органлари раҳбарларининг дебиторлик ва кредиторлик қарзларнинг ҳолати, солиқ ва тўлов интизоми масалалари бўйича ҳисоботларини эшитиш ҳамда тегишли органларга ҳисоб-китобларни юритишнинг белгиланган тартибини, юқорида кўрсатиб ўтилган масалаларни тартибга солувчи қонун ҳужжатларини бузишда айбдор бўлган мансабдор шахсларни жавобгарликка тортиш тўғрисида таклифлар киритиш;

хўжалик юритувчи субъектларга қарзларни (асосий суммани, пеняларни, жарима санкцияларини) тўлаш бўйича муддатни кечиктириш ва (ёки) бўлиб-бўлиб тўлаш имконини қонун ҳужжатларида белгиланган тартибда бериш, пеня ҳисоблашни тўхтатиб туриш ва тўхтатиш, пеняларни ҳисобдан чиқариш ҳамда бюджетга ва давлат мақсадли фондларига ҳамда вазирликлар ва идораларнинг бюджетдан ташқари фондларига солиқлар ва тўловлар бўйича жарима санкциялари белгилаш тўғрисида қарор қабул қилиш;

Ўзбекистон Республикаси Давлат солиқ қўмитаси тақдимида кўра, молия-хўжалик фаолиятини амалга оширмаётган ва қонун ҳужжатларида белгиланган муддатларда ўз устав сармояларини шакллантирмаган тугатилаётган корхоналарнинг бюджет ва давлат мақсадли фондларидан қарзларини ҳисобдан чиқариш тўғрисида қарорлар қабул қилиш;

тўловга қодир бўлмаган истеъмолчиларга ва буюртмачиларга маҳсулотлар сотишнинг, ишларни бажариш ва хизматлар кўрсатишнинг, корхоналар ва ташкилотларнинг айланма маблағларининг, шу жумладан тайёр маҳсулотлар захираларига ва тугалланмаган қурилишга жалб этилиши сабабларини ва йўналишларини ўрганиш, уларнинг олдини олиш ва қисқартириш бўйича таъсирчан чора-тадбирлар ишлаб чиқиш ва кўриш;

корхоналар, ташкилотлар, вазирликлар ва идоралардаги дебиторлик ва креди-

торлик қарзларнинг ҳолатини таққослашни ташкил этиш, таққослашлар асосида мазкур қарзларни қисқартириш бўйича тадбирлар ишлаб чиқиш;

хўжалик юритувчи субъектларнинг дебиторлик ва кредиторлик қарзларини, шу жумладан бюджетдан ва давлат мақсадли фондларидан қарзларини энг кўп миқдорда қисқартириш учун банклар кредитлари ва бошқа манбалар ҳисобига ўзаро ҳисоб-китобларнинг мақсадли схемаларини амалга ошириш масалаларини кўриб чиқиш;

хўжалик юритувчи субъектларнинг муддати ўтказиб юборилган дебиторлик ва кредиторлик қарзларини, корхоналар ва ташкилотларнинг бюджетга ва давлат мақсадли фондларига тўловлар бўйича қарзларини тўлашга йўналтириладиган мақсадли маблағлар ҳаракати тартиби ва йўналишини тасдиқлаш;

давлат ва хўжалик бошқаруви органларидан Комиссияга юкланган вазифаларнинг бажарилишини таъминлаш учун зарур ахборотларни олиш;

молия, солиқ ва божхона органлари, тижорат банклари, вазирликлар ва идораларнинг фаолиятини Комиссия ваколатига кирувчи масалалар юзасидан, қонун ҳужжатларида белгиланган тартибда текширишни ташкил этиш;

Корхоналар банкротлиги ва санацияси масалалари бўйича Ҳукумат комиссиясига иқтисодий ночор корхоналарни санация қилиш ёки уларга нисбатан банкротлик тартиботини бошлаш тўғрисида қарорлар қабул қилиш юзасидан таклифлар киритиш;

республика қонун ҳужжатларини такомиллаштириш бўйича солиқ солиш ва ҳисоб-китоблар тизимини яхшилашга йўналтирилган таклифларни ишлаб чиқиш ва Вазирлар Маҳкамасига киритиш;

минтақавий комиссиялар фаолиятини мувофиқлаштириш.

9. Комиссиянинг тўлов интизомини ҳамда ўзаро ҳисоб-китоблар тизимини мустақамлаш, хўжалик юритувчи субъектларнинг бюджет ва давлат мақсадли фондлари билан ҳисоб-китоб қилиш юзасидан жавобгарлигини ошириш соҳасидаги қонун ҳужжатларига риоя этиши шарт.

#### **IV. Комиссия фаолиятини ташкил этиш**

10. Комиссиянинг шахсий таркиби Ўзбекистон Республикаси Вазирлар Маҳкамасининг қарори билан тасдиқланади.

11. Комиссияга ҳамраислар — Ўзбекистон Республикаси Марказий банки раиси ҳамда Молия вазири бошчилик қиладилар, улар Комиссия ишига раҳбарлик қиладилар, унинг мажлисларини олиб борадилар, Комиссиянинг мажлислари протоколларини, иш режаларини ва бошқа ҳужжатларини тасдиқлайдилар.

12. Комиссия мажлислари иш режасига мувофиқ, бироқ йилнинг ҳар чорагида камида бир марта ўтказилади. Ҳамраислар навбатдан ташқари мажлислар чақиришлари мумкин.

13. Комиссиянинг иш натижалари ҳамраислар ёки мажлисни ўтказган ҳамраис томонидан тасдиқланадиган протокол шаклидаги қарорлар билан расмийлаштирилади.

14. Комиссиянинг мажлисида узрли сабабларга кўра қатнаша олмаётган аъзолари мажлисга ўзларининг овоз бериш ҳуқуқига эга бўлмаган ваколатли вакилларини юборишлари мумкин.

15. Тезкорлик билан қарор қабул қилиш мақсадида Комиссия ҳамраислари Комиссия аъзолари билан келишилган айрим масалалар бўйича қарорларни сўров йўли билан тасдиқлаши мумкин.

16. Комиссия ўз фаолияти тўғрисида Ўзбекистон Республикаси Вазирлар Маҳкамасига ҳисоб беради.

**V. Комиссия мажлислари учун материалларни тайёрлаш тартиби**

17. Комиссия фаолиятини ташкил этиш учун Комиссиянинг масъул котиби бошчилик қиладиган Комиссия котибияти ташкил этилади. У Комиссия котиби — Марказий банкнинг Иқтисодий таҳлил департаменти директори, Марказий банк, Молия вазирлиги ҳамда Давлат солиқ қўмитасининг ваколатли ходимларидан иборат бўлади. Котибият таркиби Комиссия томонидан тасдиқланади.

Комиссиянинг масъул котиби ва котиби (кейинги ўринларда Комиссия котиблари деб аталади) ишлари солиқлар ва бюджетга мажбурий тўловларнинг ўз вақтида тушиши ва (ёки) солиқлар ҳамда бюджетга ва давлат мақсадли фондларига тўловлар бўйича қарзларни бўлиб-бўлиб тўлаш масалалари ҳамда муддати ўтказиб юборилган дебиторлик ва кредиторлик қарзларни қисқартириш масалалари бўйича алоҳида-алоҳида амалга оширилади.

18. Комиссия котиблари:

Комиссия иш режаси ишлаб чиқилишини, унинг бажарилиши устидан назоратни, шунингдек тасдиқланган иш режасига мувофиқ Комиссиянинг жорий ишлари ташкил этилишини;

Комиссия котибияти билан биргаликда ушбу Низомга иловага мувофиқ Комиссия мажлисларига материалларни тайёрлашни;

Комиссия котибияти томонидан вазирликлар, идоралар, маҳаллий давлат ҳокимияти органлари, банклар, хўжалик юритувчи субъектлар билан биргаликда Комиссиянинг қабул қилинган қарорлари бажарилиши мониторинги мувофиқлаштирилишини, Комиссия ҳамраисларига тегишли ахборотлар ва таклифлар киритилишини;

келиб тушган хат-хабарларнинг кўриб чиқилишини, уларнинг ўрганиш ва ишлаб чиқиш учун Комиссия котибияти аъзоларига юборилишини;

Комиссия аъзолари ва таклиф этилган шахсларнинг тегишли материалларни юборган ҳолда мажлис ўтказиладиган сана, вақт ва жой тўғрисида хабардор қилинишини таъминлайди.

19. Комиссия котибияти:

навбатдаги давр учун Комиссиянинг иш режалари лойиҳаларини тайёрлайди; келиб тушган хат-хабарларни кўриб чиқади, Комиссияда унинг ўз ваколатлари доирасида кўриб чиқиши учун таклифлар тайёрлайди ва уларни умумлаштириш учун Комиссия котибига беради;

Комиссиянинг навбатдаги мажлислари учун барча зарур материалларнинг ўз вақтида тайёрланишини таъминлайди;

Комиссия қарорларига биноан ташкил этилган ишчи гуруҳлар фаолиятини назорат қилади;

ахборотлар ва таҳлилий материалларнинг, шу жумладан муддати ўтказиб юборилган дебиторлик ва кредиторлик қарзларнинг қисқартирилиши, солиқлар, йиғимлар ва бюджетга ҳамда бюджетдан ташқари фондларга бошқа мажбурий тўловларнинг ўз вақтида тўланиши мониторинги натижаларини Комиссияга кўриб чиқиш учун тақдим этади;

Комиссиянинг қарорларига мувофиқ Комиссияга кўриб чиқиш учун бошқа материалларни тақдим этади.

20. Комиссия котиблари ўз функцияларини амалга ошириш учун вазирликлар, идоралар, юридик шахслар бирлашмалари, маҳаллий давлат ҳокимияти органлари, банклар, корхоналар ва Комиссия аъзоларидан Комиссия фаолиятига тегишли масалаларга оид ахборотларни сўраш ва олиш ҳуқуқига эга.

21. Комиссия мажлислари учун материаллар давлат ва хўжалик бошқаруви

органлари, юридик шахслар бирлашмалари, корхоналар, шунингдек Комиссиянинг иш режасига мувофиқ уларнинг тайёрланиши учун масъул бўлган шахслар томонидан тайёрланади ҳамда Комиссиянинг навбатдаги мажлисидан камида ўн кун олдин, агар бошқа муддатлар белгиланмаган бўлса, Комиссия котибиятига киритилади.

22. Комиссия кун тартибидаги ҳар бир масала бўйича ҳужжатларда қарор қабул қилиш учун зарур бўлган материаллар (таҳлилий маълумотномалар, жадваллар, хулосалар, илтимосномалар, таклифлар ва уларга асослашлар ҳамда бошқа материаллар) ҳамда Комиссия қарори лойиҳаси мавжуд бўлиши керак.

#### **V. Иш юритиш тартиби**

23. Комиссиянинг кўриб чиқиши учун мўлжалланган хатлар, илтимосномалар, таклифлар, маълумотномалар ва бошқа хат-хабарларда «Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси» сўзлари кўрсатилиши шарт.

Комиссияда кўриб чиқиш учун мўлжалланган хат-хабарлар:

муддати ўтказиб юборилган дебиторлик ва кредиторлик қарзларни қисқартириш масалалари бўйича — Ўзбекистон Республикаси Марказий банкига; солиқлар ва бюджетга мажбурий тўловларнинг ўз вақтида тушиши ва солиқлар ҳамда бюджетга ва давлат мақсадли фондларига қарзларни тўлаш муддатини кечиктириш ва (ёки) уларни бўлиб-бўлиб тўлаш масалалари бўйича — Ўзбекистон Республикаси Давлат солиқ қўмитасига юборилади.

Келиб тушган хат-хабарлар тегишли равишда Марказий банкда ва Давлат солиқ қўмитасида бошқа хат-хабарлардан алоҳида рўйхатдан ўтказилади ва Марказий банк раисига ҳамда Молия вазирига юборилади.

Келиб тушган хат-хабарлар Комиссиянинг тегишли ҳамраиси кўриб чиққандан кейин Комиссия ҳамраиси топшириқномаси билан ижро этувчиларга юборилади.

Хатлар, илтимосномалар, таклифлар ва бошқа хат-хабарлар кўриб чиқиш учун юборилган ижро этувчилар ўн кун муддатда ёки ҳамраис топшириғида белгиланган муддатларда ўз таклифларини Ўзбекистон Республикаси Марказий банкига ва Давлат солиқ қўмитасига киритадилар.

24. Комиссия котибияти аъзолари келиб тушган хат-хабарларни кўриб чиқади-лар, Комиссиянинг ўз ваколатлари доирасида кўриб чиқиши учун таклифлар тайёрлайдилар ҳамда умумлаштириш учун уларни Комиссия котибларига берадилар.

Экспертиза пайтида камчиликлар аниқланган тақдирда ҳужжатлар пухта ишлаб чиқиш учун хат юборувчига қайтарилади.

25. Комиссия котиблари Комиссия аъзолари билан биргаликда таклифларни умумлаштирадилар, Комиссия мажлиси протоколи лойиҳасини тайёрлайдилар ва уни келишиш учун Комиссия аъзоларига юборадилар.

26. Комиссия аъзолари Комиссия протоколи лойиҳасини белгиланган тартибда келишиб оладилар.

27. Комиссия котиблари протокол лойиҳасини Комиссия мажлисига киритадилар, мажлис якунларига кўра уни пухта ишлаб чиқади-лар ва Комиссия ҳамраисларига (ёки мажлисни ўтказган Комиссия ҳамраисига) тасдиқлаш учун киритадилар.

28. Комиссия ҳамраислари (ёки мажлисни ўтказган Комиссия ҳамраиси) Комиссия мажлиси протоколини тасдиқлайди.

29. Комиссия котиблари Комиссия мажлисининг тасдиқланган протоколини



Вазирлар Маҳкамаси Ахборот-таҳлил бошқармасининг Макроиқтисодий ривожланиш таҳлили ва стратегияси бўлимига юборадилар.

30. Вазирлар Маҳкамаси Ахборот-таҳлил бошқармасининг Макроиқтисодий ривожланиш таҳлили ва стратегияси бўлими тасдиқланган протоколни Вазирлар Маҳкамасининг Умумий бўлимида рўйхатдан ўтказиши ҳамда унинг Комиссия аъзоларига, манфаатдор вазирликлар, идоралар ва бошқа ташкилотларга тарқатилишини таъминлайди.

Комиссия қарорлари (протоколлари)нинг асл нусхалари Ўзбекистон Республикаси Вазирлар Маҳкамаси Ахборот-таҳлил бошқармасининг Макроиқтисодий ривожланиш таҳлили ва стратегияси бўлимида сақланади.

Комиссия номига келиб тушган бошқа барча ҳужжатларнинг асл нусхалари ва қабул қилинган қарорлар (протоколлар)нинг нусхалари Комиссия котибларида, тегишли равишда Ўзбекистон Республикаси Давлат солиқ қўмитасида ва Марказий банкида сақланади.

Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси тўғрисидаги низомга  
ИЛОВА

### Муддати ўтказиб юборилган дебиторлик ва кредиторлик қарзларни қисқартириш ва бюджетга тўловлар интизомини мустаҳкамлаш бўйича Республика комиссияси фаолиятини ташкил этиш схемаси



Комиссияда кўриб чиқиш учун мўлжалланган хат-хабарлар:

муддати ўтказиб юборилган дебиторлик ва кредиторлик қарзларни қисқартириш масалалари бўйича — Ўзбекистон Республикаси Марказий банкига;

солиқлар ва бюджетга мажбурий тўловларнинг ўз вақтида тушиши ҳамда солиқлар ва бюджетга ҳамда давлат мақсадли фондларига тўловлар бўйича қарзларни тўлаш муддати кечиктириш ва (ёки) уларни бўлиб-бўлиб тўлаш масалалари бўйича — Ўзбекистон Республикаси Давлат солиқ қўмитасига юборилади.

Келган хат-хабарлар тегишли равишда Ўзбекистон Республикаси Марказий банкида ва Давлат солиқ қўмитасида бошқа хат-хабарлардан алоҳида рўйхатдан ўтказилади ҳамда Ўзбекистон Республикаси Марказий банки раисига ҳамда Молия вазирига юборилади.

Келиб тушган хат-хабарлар Комиссиянинг тегишли ҳамраиси томонидан кўриб чиқилгандан кейин Комиссия ҳамраисининг топшириғи билан ижро этувчиларга юборилади.

Хатлар, илтимосномалар, таклифлар ва бошқа хат-хабарлар кўриб чиқиш учун юборилган ижро этувчилар ўн кун муддатда ёки ҳамраис топшириғида белгиланган муддатларда ўз таклифларини тегишли равишда Марказий банкка ва Давлат солиқ қўмитасига киритадилар. Комиссия котибияти аъзолари келган хат-хабарларни кўриб чиқади ва Комиссияда кўриб чиқиш учун ўз таклифларини тайёрлайдилар.

Комиссия котиблари Комиссия аъзолари билан биргаликда таклифларни умумлаштирадилар ҳамда Комиссия мажлиси протоколи лойиҳасини тайёрлайдилар, уни келишиш учун Комиссия аъзоларига юборадилар.

Комиссия аъзолари Комиссия протоколи лойиҳасини белгиланган тартибда келишиб оладилар.



Комиссия котиблари протокол лойиҳасини Комиссия мажлисига киритадилар, мажлис яқунларини ҳисобга олган ҳолда уни пухта ишлаб чиқадилар ва Комиссия ҳамраисларига (ёки мажлисни ўтказган ҳамраисга) тасдиқлаш учун киритадилар.

Комиссия ҳамраислари (ёки мажлисни ўтказган ҳамраис) мажлис протоколини тасдиқлайдилар.

Комиссия котиблари Комиссия мажлисининг тасдиқланган протоколини Вазирлар Маҳкамаси Ахборот-таҳлил бошқармасининг Макроиқтисодий ривожланиш таҳлили ва стратегияси бўлимига юборадилар.

Вазирлар Маҳкамаси Ахборот-таҳлил бошқармасининг Макроиқтисодий ривожланиш таҳлили ва стратегияси бўлими тасдиқланган протоколни Вазирлар Маҳкамасининг Умумий бўлимида рўйхатдан ўтказди, унинг Комиссия аъзоларига, манфаатдор вазирликлар, идоралар ва бошқа ташкилотларга юборилишини таъминлайди.

Комиссия протоколларидаги топшириқларнинг бажарилиши мониторингини олиб борадилар.

## ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

### 179 Ўзбекистон Республикасининг гидрометеорология хизматини такомиллаштириш тўғрисида

Ўзбекистон Республикаси Президентининг «Давлат бошқаруви республика органлари тизимини такомиллаштириш тўғрисида» 2003 йил 9 декабрдаги ПФ–3358-сон Фармони бажариш юзасидан ва гидрометеорология, табиий муҳит ифлосланиши даражаси устидан кузатиш олиб бориш соҳасида бошқарув тизимини такомиллаштириш мақсадида Вазирлар Маҳкамаси **қарор қилади:**

1. Ўзбекистон Республикаси Вазирлар Маҳкамаси ҳузуридаги Гидрометеорология бош бошқармаси Ўзбекистон Республикаси Вазирлар Маҳкамаси ҳузуридаги Гидрометеорология хизмати маркази («Ўзгидромет» маркази)га айлантирилсин.

2. Қуйидагилар «Ўзгидромет» марказининг асосий вазифалари этиб белгилансин:

гидрометеорология кузатишлари давлат тизимини, республика иқтисодиёти тармоқлари, аҳолиси ва қуролли кучларини гидрометеорологик таъминлашни ривожлантириш ва такомиллаштириш;

республика давлат ва хўжалик бошқаруви органларини, корхоналар, муассасалар ва фуқароларни амалдаги ва қутилаётган гидрометеорология шарт-шароитлари ва иқлимнинг ўзгариши, табиий муҳитнинг ифлосланиши даражаси тўғрисидаги ахборот, хавфли ва стихияли гидрометеорология ходисалари пайдо бўлиши тўғрисидаги тезкор маълумотлар билан таъминлаш;

маълумотларнинг давлат гидрометеорология фондини ва табиий муҳит ифлосланиши тўғрисидаги маълумотларнинг давлат фондини шакллантириш ва юритиш;

«Юза сувлар» бўлими бўйича сувларнинг давлат ҳисобини белгиланган тартибда юритиш, давлат сув кадастрини ташкил этиш ва юритиш бўйича барча ишларни мувофиқлаштириш, йўналтириш ва бирлаштириш;

қишлоқ хўжалик экинлари ва яйлов ўсимликларининг ҳолати, стихияли гидрометеорология ҳодисалари пайдо бўлиши ва ривожланиши, атмосфера ҳавоси, тупроқ ва юза сувлар ифлосланиши устидан мунтазам кузатувларни ташкил этиш ва олиб бориш;

гидрометеорология тавсифлари учун кузатишлар олиб бориш, об-ҳавони, дарёларнинг сувлилигини, иқлимнинг ўзгаришини қисқа муддатли ва узоқ муддатли прогнозлаштиришни яхшилаш бўйича илмий-тадқиқот ишлари олиб бориш.

3. Белгилансинки, «Ўзгидромет» маркази шартномалар ва мажбуриятлар бўйича Ўзбекистон Республикаси Вазирлар Маҳкамаси ҳузуридаги Гидрометеорология бош бошқармасининг ҳуқуқий вориси ҳисобланади.

4. Қуйидагилар:

«Ўзгидромет» марказининг ташкилий тузилмаси ва унинг ходимларининг умумий чекланган сони 15,5 нафар, шу жумладан бошқарув ходимлари 14 нафар бўлган марказий аппарати 1 ва 2-иловаларга мувофиқ;

Ўзбекистон Республикаси Вазирлар Маҳкамаси ҳузуридаги Гидрометеорология хизмати маркази тўғрисидаги низом 3-иловага мувофиқ тасдиқлансин.

«Ўзгидромет» маркази бош директорига ходимларнинг белгиланган сони ва улар таъминоти харажатлар сметаси доирасида марказий аппарат тузилмаси ва штат жадвалига ўзгартиришлар киритиш ҳуқуқи берилсин.

5. «Ўзгидромет» маркази ходимлари учун бепул кийимбош билан таъминлаш, шунингдек бориш қийин бўлган станцияларнинг ходимларини бепул овқат билан таъминлашнинг мавжуд тартиби сақлаб қолинсин.

6. Ўзбекистон Республикаси Қишлоқ ва сув хўжалиги вазирлиги 2004-2005 йилларда қишлоқ хўжалиги корхоналарининг маблағлари ҳисобига идоровий агрометеорология постлари тикланишини белгиланган тартибда таъминласин.

7. «Ўзгидромет» марказининг гидрометеорология жараёнларига таъсир кўрсатиш бўйича ҳарбийлаштирилган бошқармани Ўзбекистон Республикаси Мудофаа вазирлиги ихтиёрига бериш тўғрисидаги таклифи қабул қилинсин.

«Ўзгидромет» маркази Ўзбекистон Республикаси Мудофаа вазирлиги билан биргаликда бир ой муддатда дўлга қарши ишларни амалга оширишда ўзаро ҳамкорлик қилиш тўғрисидаги низомни тайёрласин.

Ўзбекистон Республикаси Молия вазирлиги Ўзбекистон Республикаси Мудофаа вазирлиги ҳамда Қишлоқ ва сув хўжалиги вазирлиги бўйича 2004 йил учун харажатлар сметасига тегишли ўзгартиришлар киритсин.

8. Ўзбекистон Республикаси Давлат статистика қўмитаси Қишлоқ ва сув хўжалиги вазирлиги ҳамда «Ўзгидромет» маркази билан биргаликда бир ой муддатда Давлат сув кадастри юритилишини ташкил этиш имконини берувчи юза сувлардан фойдаланиш ҳақида ҳисобот бериш шаклларини ишлаб чиқсин ва тасдиқласин.

9. Ўзбекистон Республикаси Иқтисодиёт вазирлиги «Ўзбекистон ҳаво йўллари» миллий авиакомпанияси билан биргаликда уч ой муддатда аэропортларнинг гидрометеорология станцияларидаги эскирган асбоб-ускуналар ва приборларни алмаштириш масаласини кўриб чиқсин.

10. Вазирлар Маҳкамасининг «Ўзбекистон Республикаси гидрометеорология хизмати тўғрисида» 1992 йил 9 мартдаги 110-сон ва «Ўзбекистон Республикаси Вазирлар Маҳкамаси ҳузуридаги Гидрометеорология бош бошқармаси тўғрисидаги

низомни тасдиқлаш ҳақида» 1992 йил 7 майдаги 225-сон (Ўзбекистон Республикаси ҚТ, 1992 й., 5-сон, 17-модда) қарорлари ўз кучини йўқотган деб ҳисоблансин.

11. Ўзбекистон Республикаси Ҳукуматининг 4-иловага мувофиқ айрим қарорларига ўзгартиришлар киритилсин.

12. Мазкур қарорнинг бажарилишини назорат қилиш Ўзбекистон Республикасининг Бош вазири Ш.М. Мирзиёев зиммасига юклансин.

**Вазирлар Маҳкамасининг Раиси И. КАРИМОВ**

Тошкент ш.,  
2004 йил 14 апрель,  
183-сон

Вазирлар Маҳкамасининг  
2004 йил 14 апрелдаги 183-сон қарорига  
1-ИЛОВА

179-модда

### Ўзбекистон Республикаси Вазирлар Маҳкамаси ҳузуридаги Гидрометеорология хизмати маркази («Ўзгидромет» маркази)нинг ташкилий тузилмаси



Ўзбекистон Республикаси Қонун ҳужжатлари тўғрисида, 2004 й.

— 20 —

15 (99)-сон

**Ўзбекистон Республикаси Вазирлар Маҳкамаси ҳузуридаги  
Гидрометеорология хизмати маркази марказий аппаратининг тузилмаси**



Вазирлар Маҳкамасининг  
2004 йил 14 апрелдаги 183-сон қарорига  
3-ИЛОВА

## **Ўзбекистон Республикаси Вазирлар Маҳкамаси ҳузуридаги Гидрометеорология хизмати маркази тўғрисида НИЗОМ**

### **I. Умумий қоидалар**

1. Ўзбекистон Республикаси Вазирлар Маҳкамаси ҳузуридаги Гидрометеорология хизмати маркази («Ўзгидромет» маркази) Ўзбекистон Республикасида гидрометеорология соҳасидаги вазифаларни ҳал этиш учун махсус вакил қилинган давлат бошқаруви органи ҳисобланади.

«Ўзгидромет» маркази ўз фаолиятида Ўзбекистон Республикаси Вазирлар Маҳкамасига ҳисобот беради.

2. «Ўзгидромет» маркази тизимига гидрометеорология бўйича ҳудудий бошқармалар, Гидрометеорология илмий-текшириш институти, Тошкент гидрометеорология коллежи, «Ўзгидрометприбор» илмий-ишлаб чиқариш корхонаси қиради.

Гидрометеорология бўйича ҳудудий бошқармалар «Ўзгидромет» марказига ҳисобот беради.

3. «Ўзгидромет» маркази ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлисининг қарорлари ва бошқа ҳужжатларига, Ўзбекистон Республикаси Президентининг фармонлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, гидрометеорология соҳасидаги халқаро шартномаларга ҳамда мазкур Низомга амал қилади.

4. «Ўзгидромет» маркази ўз фаолиятини давлат бошқарувининг бошқа органлари, маҳаллий давлат ҳокимияти органлари, жамоат бирлашмалари ва бошқа ташкилотлар билан ўзаро ҳамкорликда амалга оширади.

5. «Ўзгидромет» марказининг моддий-техника таъминоти ҳамда «Ўзгидромет» маркази тизими ходимлари меҳнатига ҳақ тўлаш «Ўзгидромет» марказига ажратилган маблағлар доирасида давлат бюджети маблағлари ва қонун ҳужжатларида тақиқланмаган бошқа манбалар ҳисобига амалга оширилади.

6. «Ўзгидромет» маркази ва унга идоравий мансуб бўлган ташкилотлар юридик шахслар ҳисобланади, Ўзбекистон Республикасининг Давлат герби тасвири туширилган ва ўз номи ёзилган муҳрга эга бўлади.

### **II. «Ўзгидромет» марказининг вазифалари ва функциялари**

7. Қуйидагилар «Ўзгидромет» марказининг асосий вазифалари ҳисобланади: гидрометеорология кузатишлари давлат тизимини, республика иқтисодиёти тармоқлари, аҳолиси ва қуролли кучларини гидрометеорологик таъминлашни ривожлантириш ва такомиллаштириш;

республика давлат ва хўжалик бошқаруви органларини, корхоналар, муассасалар ва фуқароларни амалдаги ва кутилаётган гидрометеорология шарт-шароитлари ва иқлимнинг ўзгариши, табиий муҳитнинг ифлосланиши даражаси тўғрисидаги ахборот, хавфли ва стихияли гидрометеорология ҳодисалари пайдо бўлиши тўғрисидаги тезкор маълумотлар билан таъминлаш;



маълумотларнинг давлат гидрометеорология фондини ва табиий муҳит ифлосланиши тўғрисидаги маълумотларнинг давлат фондини шакллантириш ва юритиш;

«Юза сувлар» бўлими бўйича сувларнинг давлат ҳисобини белгиланган тартибда юритиш, давлат сув кадастрини ташкил этиш ва юритиш бўйича барча ишларни мувофиқлаштириш, йўналтириш ва бирлаштириш;

қишлоқ хўжалик экинлари ва яйлов ўсимликларининг ҳолати, стихияли гидрометеорология ҳодисалари пайдо бўлиши ва ривожланиши, атмосфера ҳавоси, тупроқ ва юза сувлар ифлосланиши устидан мунтазам кузатувларни ташкил этиш ва олиб бориш;

гидрометеорология тавсифлари учун кузатишлар олиб бориш, об-ҳавони, дарёларнинг сувлилигини, иқлимнинг ўзгаришини қисқа муддатли ва узоқ муддатли прогнозлаштиришни яхшилаш бўйича илмий-тадқиқот ишлари олиб бориш.

8. «Ўзгидромет» маркази ўзига юкланган вазифаларни бажариш учун қўйидаги функцияларни амалга оширади:

гидрометеорология соҳасидаги давлат сиёсатининг асосий йўналишлари бўйича Вазирлар Маҳкамасига таклифлар киритиш;

гидрометеорология ахборотини тўплаш, уни таҳлил этиш ва умумлаштириш; ердаги ва аэрологик гидрометеорологик кузатишлар тармоқларини, шу жумладан масофадан туриб зондлаш учун техник жиҳозлашни ривожлантириш, уларни ишлатиш ва уларни ишчи ҳолатда сақлаш;

кузатишлар маълумотларини тўплаш ва уларнинг сифатини назорат қилиш тизимини ташкил этиш ва уни ишчи ҳолатда сақлаш ҳамда тезкор гидрометеорология, иқлим хизматлари ва атроф муҳитга тегишли бўлган хизматлар кўрсатиш мақсадида уларни қайта ишлаш;

гидрометеорологик прогнозлаштириш моделлари ва тизимларини ташкил этиш ва улардан фойдаланиш;

гидрометеорологик ва иқлим маълумотлари миллий базасини ташкил этиш; миллий ва халқаро даражаларда илмий тадқиқотлар ва ишланмалар олиб бориш, гидрометеорология фанини замонавий технологиялар негизида ривожлантириш; аҳоли учун гидрометеорология ахбороти, прогнозлар ва огоҳлантиришлар шаклида хизматларнинг ҳар хил турларини кўрсатиш;

қишлоқ хўжалиги, авиация, миллий муҳофаа ва иқтисодиётнинг бошқа тармоқлари учун ижтимоий тезкор гидрометеорология хизмати кўрсатиш;

атмосферанинг ифлосланиши, юза (табиий сув оқимлари), тупроқ ифлосланиши мониторинги ва фон мониторингини (маълумотларни тўплаш, уларни қайта ишлаш, таҳлил этиш ва ахборот тайёрлаш), атмосфера ифлосланиши даражаси прогнозини юритиш;

иқлим ўзгариши мониторингини таъминлаш ва унинг тахминий прогнозларини тақдим этиш, шунингдек унинг иқлимнинг ўзгаришига таъсири чоралари ва вариантларини баҳолашга ҳисса қўшиш;

метеорология, гидрометеорология ва агрометеорология приборлари ва қурилмаларини қонун ҳужжатларида белгиланган тартибда текшириш ва аттестациядан ўтказиш;

тегишли халқаро мажбуриятларни, шу жумладан Бутунжаҳон Метеорология Ташкилоти Конвенцияси, БМТнинг иқлимнинг ўзгариши бўйича конвенцияси, БМТнинг чўлга айланиш ва қурғоқчиликка қарши кураш конвенцияси, ЮНЕСКОнинг халқаро гидрология дастури доирасида мажбуриятларни бажариш, дастурлар ва халқаро фаолиятда иштирок этиш воситасида миллий манфаатларга қўмаклашиш;

Бутунжаҳон Метеорология Ташкилотининг Жаҳон об-ҳаво хизмати тизимида минтақавий метеорология маркази функцияларини бажариш.

9. «Ўзгидромет» маркази ўзига юкланган вазифалар ва функцияларни бевосита худудий бошқармалар ва ўзига идоровий мансуб ташкилотлар орқали ҳал этади.

### III. «Ўзгидромет» марказининг ҳуқуқ ва жавобгарлиги

10. «Ўзгидромет» маркази ўзига юкланган вазифалар ва функцияларни бажариш учун қуйидаги ҳуқуқларга эга:

Ўзбекистон Республикаси вазирликлари ва давлат бошқаруви бошқа органларидан, корхоналар ва ташкилотлардан «Ўзгидромет» марказига юкланган вазифаларни бажариш учун зарур бўлган гидрометеорология бўйича материалларни олиш;

Бутунжаҳон Метеорология Ташкилоти ва Гидрометеорология бўйича Давлатлараро Кенгашда Ўзбекистон Республикаси манфаатларини белгиланган тартибда ифодалаш;

ҳалқаро ташкилотларнинг мутахассисларини эксперт сифатида жалб этиш;

хўжалик шартномалари асосида ихтисослаштирилган гидрометеорология хизмати ишларини бажариш.

«Ўзгидромет» маркази Ўзбекистон Республикаси қонун ҳужжатларига мувофиқ бошқа ҳуқуқларга ҳам эгадир.

11. «Ўзгидромет» маркази, ўз ваколатлари доирасида, вазирликлар, давлат қўмиталари, идоралар, маҳаллий давлат ҳокимияти органлари ва мулкчилик шаклларида қатъи назар хўжалик юритувчи субъектлар ҳамда мансабдор шахслар ва фуқаролар томонидан бажарилиши мажбурий бўлган қарорлар ва норматив-ҳуқуқий ҳужжатлар қабул қилишга ҳақлидир.

«Ўзгидромет» маркази, зарур ҳолларда, бошқа вазирликлар, давлат қўмиталари ва идоралар билан биргаликда қўшма қарорлар ва ҳужжатлар чиқаришга ҳақлидир.

12. «Ўзгидромет» маркази ўзига юкланган вазифалар самарали бажарилиши учун жавоб беради.

### IV. «Ўзгидромет» маркази фаолиятини ташкил этиш

13. «Ўзгидромет» марказига қонун ҳужжатларида белгиланган тартибда лавозимга тайинланадиган ва лавозимдан озод этиладиган Бош директор бошчилик қилади.

Бош директор уч нафар ўринбосарга, шу жумладан бир нафар биринчи ўринбосарга эга бўлади.

«Ўзгидромет» маркази Бош директорининг ўринбосарлари қонун ҳужжатларида белгиланган тартибда лавозимга тайинланадилар ва лавозимдан озод этиладилар.

«Ўзгидромет» маркази Бош директори мақомига кўра вазирга, Бош директорнинг биринчи ўринбосари — вазирнинг биринчи ўринбосарига, Бош директорнинг ўринбосарлари — вазирнинг ўринбосарларига тенглаштирилади.

14. Бош директор:

«Ўзгидромет» маркази фаолиятига яқкабошчилик асосида умумий раҳбарлик қилади;

«Ўзгидромет» маркази ваколатига кирадиган масалалар бўйича қарорлар қабул қилади ва «Ўзгидромет» марказига юкланган вазифалар ва функциялар бажарилиши учун шахсан жавоб беради;

ўз ўринбосарлари ваколатларини белгилайди, улар ўртасида вазифаларни тақсимлайди, «Ўзгидромет» маркази тизимининг бошқа мансабдор шахслари вако-

латларини, «Ўзгидромет» маркази фаолиятининг айрим участкаларига раҳбарлик қилиш учун ўз ўринбосарлари ва бошқа мансабдор шахсларнинг жавобгарлиги даражасини ҳамда ўзига қарашли бўлинмалар ва ташкилотлар ишини белгилайди;

«Ўзгидромет» маркази тизими ходимлари бажариши мажбурий бўлган буйруқлар чиқаради ва кўрсатмалар беради;

«Ўзгидромет» марказининг тузилмасига ходимларнинг белгиланган умумий сони доирасида ўзгартиришлар киритади, «Ўзгидромет» маркази марказий аппаратининг штат жадвалини, шунингдек «Ўзгидромет» маркази марказий аппарати, марказга қарашли бўлинмалар ва ташкилотларнинг харажатлари сметасини тасдиқлайди;

«Ўзгидромет» марказининг таркибий ва ҳудудий бошқармалари тўғрисидаги низомларни, «Ўзгидромет» маркази тизимига кирадиган ўзига қарашли ташкилотларнинг низомлари (уставлари)ни белгиланган тартибда тасдиқлайди;

«Ўзгидромет» маркази марказий аппарати ходимларини, «Ўзгидромет» маркази тизимига кирадиган таркибий ва ҳудудий бошқармалар ва ташкилотлар раҳбарларини белгиланган тартибда лавозимга тайинлайди ва лавозимдан озод этади;

Ўзбекистон Республикасининг қонун ҳужжатларига мувофиқ бошқа ваколатларни амалга оширади.

15. Ҳудудий бўлинмалар ўз фаолиятини Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимлари билан келишган ҳолда «Ўзгидромет» маркази томонидан тасдиқланадиган низомларга мувофиқ амалга оширади.

«Ўзгидромет» марказининг вилоят бўлинмалари раҳбарлари тегишли равишда Қорақалпоғистон Республикаси Вазирлар Кенгаши раиси, вилоятлар ва Тошкент шаҳар ҳокимларининг тақдимномаси бўйича «Ўзгидромет» марказининг Бош директори томонидан тайинланади.

16. «Ўзгидромет» марказини қайта ташкил этиш ва тугатиш қонун ҳужжатларида белгиланган тартибда амалга оширилади.

Вазирлар Маҳкамасининг  
2004 йил 14 апрелдаги 183-сон қарорига  
4-ИЛОВА

### **Ўзбекистон Республикаси Ҳукуматининг айрим қарорларига киритилаётган ўзгартиришлар**

1. Вазирлар Маҳкамасининг «Фуқаро авиацияси халқаро ташкилоти ишлари бўйича Ўзбекистон Республикаси Давлат комиссияси тўғрисида» 1993 йил 7 июндаги 271-сон қарори 3-бандининг иккинчи хатбошидаги «Гидрометеорология бош бошқармасининг бошлиғи» сўзлари «Гидрометеорология хизмати марказининг бош директори» сўзлари билан алмаштирилсин.

2. Вазирлар Маҳкамасининг 1995 йил 2 октябрдаги 375-ф-сон фармойиши 1-бандидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

3. Вазирлар Маҳкамасининг «Ўзбекистон Республикаси Фавқулодда вазиятлар вазирлигининг фаолиятини ташкил этиш масалалари тўғрисида» 1996 йил 11 апрелдаги 143-сон қарори 13-бандининг биринчи хатбошидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

4. Вазирлар Маҳкамасининг 1996 йил 17 июлдаги 255-сон қарори (Ўзбекистон Республикаси ҚТ, 1996 й., 7-сон, 21-модда) билан тасдиқланган Ўзбекистон Республикаси давлат кадастрлари ягона тизимини ташкил этиш ва уни юритиш тарти-

би тўғрисидаги низомнинг 8-банди учинчи хатбошидаги «Бошгидромет» сўзи «Гидрометеорология хизмати маркази» сўзлари билан алмаштирилсин.

5. Вазирлар Маҳкамасининг 1997 йил 2 июндаги 218-ф-сон фармойишининг 1-банди ва 2-банди биринчи хатбошидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

6. Вазирлар Маҳкамасининг 1997 йил 12 июлдаги 549-сон қарорида:

Ҳаво бўшлиғидан фойдаланишга буюртма ва Ҳаво ҳужумига қарши мудофаа кўшинларига хабарнома бериш тартибининг 3-бандидаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин;

Ўзбекистон Республикаси Ҳаво бўшлиғидан фойдаланиш ягона тизимининг идоралараро комиссияси ва бошқарув органлари тўғрисидаги низом 3-бандининг тўртинчи хатбошидаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин.

7. Вазирлар Маҳкамасининг 1998 йил 7 январдаги 11-сон қарори билан тасдиқланган Ўзбекистон Республикаси Давлат сув кадастрини ишлаб чиқиш ва юритиш тартиби тўғрисидаги низомда:

12-банддаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин;

17—19, 22, 28—30-бандлардаги «Гидрометеорология бош бошқармаси» сўзлари «Ўзгидромет» маркази» сўзлари билан алмаштирилсин;

32-банддаги «Гидрометеорология бош бошқармасининг» сўзлари «Ўзгидромет» марказининг» сўзлари билан алмаштирилсин;

«Ўзбекистон Республикаси Вазирлар Маҳкамаси ҳузуридаги Гидрометеорология бош бошқармасининг Давлат сув кадастрини юритиш бўйича функциялари» бўлимининг номи «Ўзбекистон Республикаси Вазирлар Маҳкамаси ҳузуридаги Гидрометеорология хизмати марказининг Давлат сув кадастрини юритиш бўйича функциялари» деб номлансин;

34-банддаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин;

37, 38, 41, 42-бандларидаги «Гидрометеорология бош бошқармасига» сўзлари «Гидрометеорология хизмати марказига» сўзлари билан алмаштирилсин.

8. Вазирлар Маҳкамасининг 1999 йил 20 октябрдаги 469-сон қарори билан тасдиқланган 1999—2005 йилларда Ўзбекистон Республикасининг атроф муҳитни муҳофаза қилиш ишлари дастурини амалга ошириш тадбирларининг 2.12-бандидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

9. Вазирлар Маҳкамасининг «Чимён-Чорвоқ зонаси табиий бойлиқларини сақлаш ҳамда ҳудудни ўзлаштиришга комплекс ва изчиллик билан ёндошишни таъминлаш чора-тадбирлари тўғрисида» 2000 йил 10 мартдаги 83-сон қарорининг 6 ва 7-бандларидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

10. Вазирлар Маҳкамасининг «1999—2005 йилларда Ўзбекистон Республикасининг атроф муҳитни муҳофаза қилиш ишларининг дастурини амалга ошириш масалалари тўғрисида» 2000 йил 9 октябрдаги 389-сон қарорида:

2-банднинг иккинчи хатбошидаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин;

Парник газлари эмиссиясини камайтириш миллий стратегиясини амалга ошириш бўйича тадбирларнинг 3, 6, 8 ва 10-бандларидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

11. Вазирлар Маҳкамасининг 2000 йил 23 декабрдаги 496-сон қарори (Ўзбекистон Республикаси ҚТ, 2000 й., 12-сон, 79-модда) билан тасдиқланган Ўзбекистон Республикасида Ер мониторинги тўғрисидаги низомнинг 9-бандидаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин.

12. Вазирлар Маҳкамасининг 2001 йил 17 январдаги 32-сон қарори билан тасдиқланган Тугатилаётган ёки бошқа идораларга берилаётган ҳамда Қишлоқ ва сув хўжалиги вазирлиги таркибидан чиқарилаётган ташкилотлар ва корхоналар рўйхатининг 6-банди чиқариб ташлансин.

13. Вазирлар Маҳкамасининг «Ўзбекистон Республикасида атроф табиий муҳитнинг давлат мониторинги тўғрисидаги низомни тасдиқлаш ҳақида» 2002 йил 3 апрелдаги 111-сон қарорида (Ўзбекистон Республикаси ҚТ, 2002 й., 4-сон, 19-модда):

2-банднинг биринчи хатбошидаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин;

Ўзбекистон Республикасида атроф табиий муҳитнинг давлат мониторинги тўғрисидаги низомда:

12-банднинг учинчи хатбошидаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин;

Низомга 1 ва 2-иловалардаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

14. Вазирлар Маҳкамасининг «2003—2007 йиллар даврида Қорақалпоғистон Республикасида қишлоқ хўжалиги ишлаб чиқариши барқарор ривожлантирилишини таъминлашга доир қўшимча чора-тадбирлар тўғрисида» 2002 йил 1 августдаги 276-сон қарори 1-бандининг бешинчи хатбошидаги «Бошгидромет» бошқармаси» сўзлари «Ўзгидромет» маркази» сўзлари билан алмаштирилсин.

15. Вазирлар Маҳкамасининг 2003 йил 13 январдаги 16-сон қарори билан тасдиқланган 2003—2005 йилларда Ўзбекистон Республикасида атроф табиий муҳит мониторинги Дастурида, А.2, А.3, А.4, А.5, А.6.1, Б.1, Б.2, В бандларидаги «Бошгидромет» бошқармасининг» сўзлари «Ўзгидромет» марказининг» сўзлари билан алмаштирилсин.

16. Вазирлар Маҳкамасининг 2003 йил 30 декабрдаги 576-сон қарори билан тасдиқланган 2004 йил учун статистик ишлар Дастурида, «Бошқа вазирликлар ва идоралар томонидан бажариладиган статистик ишлар» II бўлимдаги «Гидрометеорология бош бошқармаси» сўзлари «Гидрометеорология хизмати маркази» сўзлари билан алмаштирилсин.

**БЕШИНЧИ БЎЛИМ**

ЎЗБЕКИСТОН РЕСПУБЛИКАСИ МОЛИЯ ВАЗИРЛИГИ  
ЎЗБЕКИСТОН РЕСПУБЛИКАСИ ДАВЛАТ МУЛКИНИ БОШҚАРИШ ВА  
ТАДБИРКОРЛИКНИ ҚўЛЛАБ-ҚУВВАТЛАШ ДАВЛАТ ҚўМИТАСИНING  
ҚАРОРИ

**180** Давлат улушини бошқариш бўйича кўрсатилган хиз-  
матлар учун тўловларни амалга ошириш тартиби  
тўғрисидаги низомга ўзгартириш ва қўшимчалар киритиш  
хақида

*Ўзбекистон Республикаси Адлия вазирлиги томонидан 2004 йил  
12 апрелда 1262-1-сон билан давлат рўйхатидан ўтказилди*

*(2004 йил 22 апрелдан кучга киради)*

Ўзбекистон Республикаси Президентининг 2003 йил 24 январдаги ПФ-3202 сонли «Ўзбекистон иқтисодиётида хусусий секторнинг улуши ва аҳамиятини тубдан ошириш чора-тадбирлари тўғрисида»ги Фармони ҳамда Вазирлар Маҳкамасининг 2003 йил 19 апрелдаги 189-сонли «Хусусийлаштирилган корхоналарни корпоратив бошқаришни такомиллаштириш чора-тадбирлари тўғрисида»ги қарори талабларини бажариш мақсадида **қарор қиламиз:**

1. Ўзбекистон Республикаси Молия вазирлиги ва Давлат мулки қўмитаси томонидан 2003 йил 16 июль куни 86-сон билан тасдиқланган давлат улушини бошқариш бўйича кўрсатилган хизматлар учун тўловларни амалга ошириш тартиби тўғрисидаги низомга (2003 йил 1 август, рўйхат рақами 1262-сон — Меъёрий ҳужжатлар ахборотномаси, 2003 й., 15-сон) иловага\* мувофиқ ўзгартириш ва қўшимчалар киритилсин.

2. Ушбу қарор Ўзбекистон Республикаси Адлия вазирлиги томонидан давлат рўйхатидан ўтказилган кундан бошлаб ўн кун ўтганидан кейин кучга киради.

**Молия вазири М. НУРМУРАТОВ**

Тошкент ш.,  
2004 йил 4 март,  
38-сон

**Давлат мулкни бошқариш ва тадбиркорликни қўллаб-қувватлаш  
Давлат қўмитаси раиси М. АСҚАРОВ**

Тошкент ш.,  
2004 йил 4 март,  
01/06-04-сон

---

\* Илова рус тилидаги матнда берилди.

ЎЗБЕКИСТОН РЕСПУБЛИКАСИ МАРКАЗИЙ БАНКИ БОШҚАРУВИНИНГ  
ҚАРОРИ**181** Нақд чет эл валютасида операцияларни амалга ошириш қоидаларига ўзгартириш ва қўшимчалар киритиш тўғрисида

*Ўзбекистон Республикаси Адлия вазирлиги томонидан 2004 йил  
15 апрелда 957-1-сон билан давлат рўйхатидан ўтказилди*

*(2004 йил 25 апрелдан кучга киради)*

Ўзбекистон Республикасининг «Валютани тартибга солиш тўғрисида»ги Қонунининг янги таҳририга мувофиқ Марказий банк Бошқаруви **қарор қилади:**

1. «Нақд чет эл валютасида операцияларни амалга ошириш қоидалари»га (2000 йил 17 август, рўйхат рақами 957-сон) иловага\* мувофиқ ўзгартириш ва қўшимчалар киритилсин.

2. Ушбу қарор Ўзбекистон Республикаси Адлия вазирлигида давлат рўйхатига олинган кундан 10 кун ўтгандан сўнг кучга киритилсин.

**Марказий банк Бошқаруви раиси Ф. МУЛЛАЖОНОВ**

Тошкент ш.,  
2004 йил 21 февраль,  
474-1-сон

ЎЗБЕКИСТОН РЕСПУБЛИКАСИ МАРКАЗИЙ БАНКИ БОШҚАРУВИНИНГ  
ҚАРОРИ**182** Тижорат банклари томонидан фермер хўжаликларига бўлғуси ҳосилни гаровга олган ҳолда кредит бериш тартиби тўғрисида низомни тасдиқлаш ҳақида

*Ўзбекистон Республикаси Адлия вазирлиги томонидан 2004 йил  
16 апрелда 1337-сон билан давлат рўйхатидан ўтказилди*

*(2004 йил 26 апрелдан кучга киради)*

Ўзбекистон Республикаси Президентининг 2003 йил 27 октябрдаги ПФ-3342-сонли «2004—2006 йилларда фермер хўжалиklarини ривожлантириш концепцияси тўғрисида»ги Фармони, Ўзбекистон Республикаси Вазирлар Маҳкамасининг 2003 йил 30 октябрдаги 476-сонли «2004—2006 йилларда фермер хўжалиklarини ривожлантириш

---

\* Илова рус тилидаги матнда берилди.



концепциясини амалга ошириш чора-тадбирлари тўғрисида»ги қарори билан тасдиқланган «2004—2006 йилларда фермер хўжалиklarини ривожлантириш концепциясини амалга ошириш чора-тадбирлари дастури» ижросини таъминлаш мақсадида Марказий банк Бошқаруви **қарор қилади:**

1. Тижорат банклари томонидан фермер хўжалиklarига бўлғуси ҳосилни гаровга олган ҳолда кредит бериш тартиби тўғрисида низом иловага мувофиқ тасдиқлансин.

2. Ушбу қарор Ўзбекистон Республикаси Адлия вазирлигида давлат рўйхатига олинган кундан 10 кун ўтгач амалга киритилсин.

### Марказий банк Бошқаруви раиси **Ф. МУЛЛАЖОНОВ**

Тошкент ш.,  
2004 йил 1 март,  
563-сон

Марказий банки Бошқарувининг  
2004 йил 1 мартдаги 563-сонли  
қарори билан  
ТАСДИҚЛАНГАН

### **Тижорат банклари томонидан фермер хўжалиklarига бўлғуси ҳосилни гаровга олган ҳолда кредит бериш тартиби тўғрисида НИЗОМ**

Мазкур Низом Ўзбекистон Республикасининг Фуқаролик кодекси, «Ўзбекистон Республикаси Марказий банки тўғрисида», «Банклар ва банк фаолияти тўғрисида», «Фермер хўжалиklари тўғрисида»ги қонунлари ҳамда Ўзбекистон Республикаси Президентининг 2003 йил 27 октябрдаги ПФ-3342-сонли «2004—2006 йилларда фермер хўжалиklarини ривожлантириш концепцияси тўғрисида»ги Фармони ва Ўзбекистон Республикаси Вазирлар Маҳкамасининг 2003 йил 30 октябрдаги 476-сонли «2004—2006 йилларда фермер хўжалиklarини ривожлантириш концепциясини амалга ошириш чора-тадбирлари тўғрисида»ги қарорига мувофиқ ишлаб чиқилган бўлиб, у тижорат банклари томонидан фермер хўжалиklarига бўлғуси ҳосилни гаровга олган ҳолда кредит (кейинги ўринларда — кредит) бериш тартибини белгилайди.

#### **I. Умумий қоидалар**

1. Ушбу Низом асосида кредитлар давлат эҳтиёжлари учун қишлоқ хўжалиги маҳсулотлари етиштирувчи фермер хўжалиklarига қайтаришлик, тўловлилик, таъминланганлик, муддатлилик ва мақсадли фойдаланиш шартлари асосида берилади.

Давлат эҳтиёжи учун қишлоқ хўжалиги маҳсулотлари етиштириб бермайдиган фермер хўжалиklarини кредитлаш Марказий банкнинг «Тижорат банклари томонидан фермер хўжалиklари, шунингдек кичик бизнес субъектларини миллий валютада кредитлаш Тартиби» (2000 йил 7 март, рўйхат рақами 907-сон — Меърий ҳужжатлар ахборотномаси, 2000 й., 5-сон) асосида амалга оширилади.

2. Ўзбекистон Республикаси Молия вазирлиги ҳузуридаги Давлат эҳтиёжлари учун харид қилинадиган қишлоқ хўжалиги маҳсулотларининг ҳисоб-китоб жамғар-

маси (кейинги ўринларда — Жамғарма) кредит линиялари ҳисобидан имтиёзли кредит олган фермер хўжаликларига галла етиштириш учун «Ўздонмахсулот» тайёрлов корхоналари билан тузилган контрактация шартномаси суммасининг 30 фоизгача миқдорида, ушбу кредит линиялари ҳисобидан имтиёзли кредит олмаган фермер хўжаликларига контрактация шартномаси суммасининг 80 фоизгача миқдорида кредит берилиши мумкин.

Жамғарма кредит линиялари ҳисобидан имтиёзли кредит олган пахта хом ашёси етиштирадиган фермер хўжаликларига ушбу кредит контрактация шартномаси суммасининг 20 фоизгача миқдорида, ушбу кредит линиялари ҳисобидан имтиёзли кредит олмаган фермер хўжаликларига бериладиган кредит миқдори контрактация шартномаси суммасининг 70 фоизгача миқдорда берилади.

3. Кредитлар мазкур Низомда белгиланган шартлар асосида кредитни қайтаришга қодир бўлган қарз олувчиларга шартнома асосида 1,5 йилгача (18 ой) бўлган муддатга, қайтариш муддатини узайтириш ҳуқуқисиз миқдорнинг асосий талаб қилиб олингунча депозит ҳисобварағи жойлашган манзил бўйича берилади.

4. Кредитлардан фойдаланганлик учун фоиз ставкалари миқдори қарз олувчи ва банк ўртасидаги ўзаро келишувга кўра кредит шартномаси асосида белгиланади.

5. Кредитлар қарз олувчиларга қуйидаги мақсадлар учун берилади:

қишлоқ хўжалиги техникаси, эҳтиёт қисмлар ва ускуналарни харид қилиш;

ёнилғи-мойлаш материалларини харид қилиш;

минерал ўғит, ўсимликларни ҳимоя қилишнинг кимёвий ва биологик воситалари, ветеринария дори-дармонлари сотиб олишга

МТП, муқобил МТП, ширкат хўжаликлари, СФУ (Сувдан фойданувчилар уюшмаси), бошқа хўжалик субъектлари хизматларидан фойдаланганлик учун тўловлар;

бевосита галла ва пахта хом ашёси ишлаб чиқариш фаолияти билан боғлиқ бўлган бошқа харажатлар учун.

## II. Кредитларни расмийлаштириш тартиби

6. Кредит олиш учун фермер хўжалиги унинг асосий депозит ҳисобварағига хизмат кўрсатаётган банкка қуйидаги ҳужжатларни тақдим этишлари лозим:

кредит олиш учун ариза;

тайёрлов ташкилотлари билан тузилган контрактация шартномалари нусхалари;

пул оқими таҳлили мажбурий тарзда кўрсатилган бизнес-режа;

охирги ҳисобот санасига Давлат солиқ хизматининг маҳаллий (туман) идораси томонидан тасдиқланган бухгалтерлик баланси (1-шакл), дебиторлик ва кредиторлик қарзи ҳақидаги маълумотнома (2а-шакл), шунингдек, 90 кундан ортиқ муддатдаги қарздорликни солиштириш далолатномалари, молиявий натижалари ҳақида ҳисобот (2-шакл).

кредитни қайтариш таъминоти.

7. Олинадиган кредитнинг қайтариш таъминоти сифатида қарз олувчи банкка ўзига узоқ муддатга ижарага берилган ердан жорий йилда олинадиган бўлғуси ҳосилни таъминот сифатида тақдим этади.

Бунда банк ва фермер хўжалиги ўртасида бўлажак ҳосилни гарови шартномаси имзоланади. Шартномада гаровга қўйилган ҳосилни «Ўздонмахсулот» ва «Пахтасаноат» тайёрлов корхоналарига ва бошқа хўжалик субъектларига сотишдан тушган барча пул маблағлари биринчи навбатда ушбу кредитлар ва улар бўйича ҳисобланган фоизларни тўлашга йўналтирилиши тўғрисидаги шартлар белгилаб қўйилади.

Шунингдек, гаров шартномасига фермер хўжалиги томонидан бўлғуси ҳосил-

ни кредит берган банк-бенефициар фойдасига ихтиёрий суғурта қилинганлиги тўғрисидаги суғурта полисини илова этиши шарт.

8. Кредит сўраб, мазкур Низомнинг 6 ва 7-бандларида кўрсатилган барча зарур ҳужжатларни илова қилган ҳолда, берилган аризининг банкка келиб тушган кундан бошлаб, ушбу ариза бўйича банк томонидан кредит бериш ёки рад қилиш ҳақида хулоса бериш муддати 10 иш кунидан ошмаслиги лозим.

9. Кредит шартномаси тузилганидан сўнг кредит бўлими бошлиғи (ходими), бериладиган кредитнинг миқдори, муддати ва фоиз ставкасини кўрсатган ҳолда, ссуда ҳисобварағини очиш тўғрисида бухгалтерияга фармойиш беради.

### **III. Кредитларни бериш, ҳисобини юритиш ва кредитни қайтариш тартиби**

10. Банк ва фермер хўжалиги ўртасида кредит шартномаси имзоланиб, у амалга киритилганидан кейин, банк фермер хўжалиги учун алоҳида ссуда ҳисобварағини очадди ва ундан қарз олувчининг тўлов топшириқномалари асосида фақат нақд пулсиз шаклда тўловларни амалга ошириш йўли билан берилади.

11. Берилган кредитлар 14301 — «Хусусий корхоналарга, ширкатлар ва корпорацияларга берилган ўрта муддатли ссудалар» баланс ҳисобварағида ҳисобга олинади.

12. Алоҳида ссуда ҳисобварақлари бўйича берилган кредитлар бўйича муддатли мажбуриятномалар расмийлаштирилади ва улар кредит бўлими ходимининг фармойишига кўра кредит тўла қайтарилгунига қадар 91903 — «Қарз олувчиларнинг ўрта муддатли ссудалар бўйича мажбуриятлари» номли, кўзда тутилмаган шароитлар ҳисобварағида ҳисобга олинади.

13. Тижорат банклари томонидан кредитдан фойдаланишнинг бутун муддати давомида доимий мониторинг амалга оширилади ва у қарз олувчи томонидан унинг лойиҳаси ва кредит шартномаси шартларининг амалга оширилишига ҳар томонлама кўмаклашишга қаратилган бўлиши лозим. Банклар томонидан мониторинг амалга оширилиш тартиби, берилган кредитлар бошқа мақсадларда ишлатилган қарздорга нисбатан қўлланиладиган жавобгарлик чоралари кредит шартномасида белгилаб қўйилган бўлиши керак.

14. Мониторинг жараёнида фермер хўжалиги томонидан етиштирилаётган экинлар ҳолати ва уларни парваришlash бўйича зарур агротехника ишларининг ўтказилиши ва кредитдан самарали ҳамда мақсадли фойдаланиш бўйича жойларга бориб ўрганишлар ўтказиб турилади. Экинлар (тўлиқ ёки қисман) мавжуд бўлмаган ёки улар аҳволининг қониқарсизлиги, жумладан, агротехника тадбирларининг муддатида амалга оширилмаслиги, экин майдонини бегона ўтлар босиб кетгани, суғорилмаганлик натижасида экинларни нобуд бўлиш хавфи вужудга келгани ва шунга ўхшаш ҳолатлар сабабли етарли ҳосил тўпланмаслиги хавфи вужудга келса, банк кредитлашни тўхтатади ҳамда берилган кредит ва унга ҳисобланган фоизларни муддатидан олдин ундириб олади. Ушбу ҳолатлар кредит шартномасида келишиб олинган бўлиши лозим.

15. Кредитдан фойдаланганлик учун фоизларни ҳисоблаш қонунчиликда белгиланган тартибда амалга оширилади, уларни ундириш ойда бир марта, кредит шартномасида келишилган санада амалга оширилади. Олинган кредит бўйича ҳисобланган фоизларнинг қолдиғи ва асосий қарз тўлови қарз олувчининг махсус 23210, 23220-сонли ҳисобварақларига қишлоқ хўжалик маҳсулотларини тайёрлов корхоналарига сотишдан тушган маблағлар ҳисобидан биринчи навбатда амалга оширилади. Бунда ҳисобланган фоизлар кредит бўйича қарздан олдин ундириб олинади.

Фермер хўжаликлари кредит бўйича асосий қарз ва ҳисобланган фоизларни кредит шартномасида белгиланган муддатдан олдин қайтариш ҳуқуқига эгалар.

16. Қарздорнинг 23210, 23220-сонли махсус ҳисобварағидаги маблағлар олинган кредит ва унга ҳисобланган фоизларни тўлаш учун етарли бўлмаган тақдирда, фоизлар ва кредит қолдиғини ундириш қарздорнинг асосий талаб қилиб олингунча депозит ҳисобварағида мавжуд маблағлар ҳисобидан қонунчиликда белгиланган навбат тартибида амалга оширилади.

Бунда ҳисобланган фоизлар ва кредит қолдиғи муддати ўтган ссудалар ҳисобварағи орқали ундириб олишга тақдим этилади, у бўйича муддатли мажбуриятномалар эса 2-картотекага жойлаштирилади

17. Қарздорнинг асосий талаб қилиб олингунча депозит ҳисобварағида ҳисобланган фоизлар ва кредит қолдиғини ундириш учун маблағлар етарли бўлмаган тақдирда, банк қарздорнинг муддатли мажбуриятномаси асосида унинг барча иккиламчи депозит ҳисобварақлари очилган банкларга ушбу ҳисобварақларда мавжуд пул маблағларини асосий талаб қилиб олингунча депозит ҳисобварағига ўтказиб беришни сўраб ёзма талаб йўллайди. Қарздорнинг иккиламчи талаб қилиб олингунча депозит ҳисобварағи очилган банклар кредитор банкнинг ушбу талабини Фуқаролик кодексининг 784-моддаси талабларидан келиб чиққан ҳолда, мемориал ордер билан иккиламчи талаб қилиб олингунча депозит ҳисобварағи эгасининг асосий талаб қилиб олингунча депозит ҳисобварағига ўтказиб бериши шарт. Бунда қарздорнинг асосий талаб қилиб олингунча депозит ҳисобварағига келиб тушган маблағлар ҳисобидан фоизлар ва кредит қолдиғи «Хўжалик юритувчи субъектларнинг банк ҳисобварақларидан пул маблағларини ҳисобдан ўчириш тартиби тўғрисида»ги Йўриқномада (1999 йил 30 январь, рўйхат рақами 615-сон) белгиланган календарь навбати тартибида ундирилади. Бунда фоизлар кредитдан олдин қайтарилади.

18. Агар қарздор томонидан етиштирилган ҳосилни сотишдан тушган маблағлар ва унинг талаб қилиб олингунча депозит ҳисобварағларидаги маблағлари банк кредитини ва ҳисобланган фоизлар бўйича тўловларни амалга оширишга етарли бўлмаган тақдирда, банк бўлғуси ҳосилни суғуртаси тўловидан олинган маблағларни кредитни ва ҳисобланган фоизлар тўловини амалга оширишга йўналтиради.

Ҳосилни сотишдан ҳамда суғурта тўловларидан тушган маблағлар ҳисобланган фоизлар ва кредитни қайтаришга етмаган тақдирда банк томонидан кредит ва ҳисобланган фоиз қолдиғи Ўзбекистон Республикаси Вазирлар Маҳкамасининг 2002 йил 4 декабридаги 422-сонли қарори билан тасдиқланган «Банкларнинг кредитлари бўйича қарздорлик ўз вақтида қайтарилмаган тақдирда ундирувни қарздорларнинг ликвидли мол-мулкига қаратиш тартиби»да белгиланган тартибда ундириб олинади.

19. Мазкур Низом Ўзбекистон Республикаси Молия вазирлиги, Қишлоқ ва сув хўжалиги вазирлиги, Давлат мулкни бошқариш ва тадбиркорликни қўллаб-қувватла қўмитаси, Ер ресурслари давлат қўмитаси ҳамда Дехқон ва фермер хўжаликлари уюшмаси билан келишилди.

**Молия вазири М. НУРМУРАТОВ**

Тошкент ш.,  
2004 йил 27 февраль.

**Қишлоқ ва сув хўжалиги вазири А. ЖЎРАЕВ**

Тошкент ш.,  
2004 йил 27 февраль.

**Давлат мулкани бошқариш ва тадбиркорликни қўллаб-қувватлаш  
қўмитаси раиси М. АСҚАРОВ**

Тошкент ш.,  
2004 йил 27 февраль.

**Ер ресурслари давлат қўмитаси  
раиси Э. ҚУРБОНОВ**

Тошкент ш.,  
2004 йил 27 февраль.

**Деҳқон ва фермер хўжаликлари уюшмаси  
раиси С. ҚОБИЛОВ**

Тошкент ш.,  
2004 йил 27 февраль.

**ЎЗБЕКИСТОН РЕСПУБЛИКАСИ МОЛИЯ ВАЗИРИНИНГ  
БУЙРУҒИ**

**183 Суғурталовчининг ижро этувчи органи раҳбарига ва  
бош бухгалтерига қўйиладиган малака талаблари  
тўғрисидаги низомни тасдиқлаш ҳақида**

*Ўзбекистон Республикаси Адлия вазирлиги томонидан 2004 йил  
16 апрелда 1338-сон билан давлат рўйхатидан ўтказилди*

*(2004 йил 26 апрелдан кучга киради)*

Ўзбекистон Республикаси «Суғурта фаолияти тўғрисида»ги Қонуннинг 10-моддаси ва Ўзбекистон Республикаси Вазирлар Маҳкамасининг 1998 йил 8 июлдаги 286-сонли «Суғурта фаолиятини давлат томонидан тартибга солиш чора-тадбирлари тўғрисида»ги қарорнинг 3-бандига мувофиқ **буюраман:**

1. Илова қилинган Суғурталовчининг ижро этувчи органи раҳбарига ва бош бухгалтерига қўйиладиган малака талаблари тўғрисидаги низом тасдиқлансин.

2. Ушбу буйруқ Ўзбекистон Республикаси Адлия вазирлигида давлат рўйхати-га олинган кундан ўн кун ўтгач кучга киритилсин.

**Молия вазири М. НУРМУРАТОВ**

Тошкент ш.,  
2004 йил 25 март,  
52-сон

Молия вазирининг  
2004 йил 25 мартдаги 52-сон  
буйруғи билан  
ТАСДИҚЛАНГАН

## **Суғурталовчининг ижро этувчи органи раҳбарига ва бош бухгалтерига қўйиладиган малака талаблари тўғрисида НИЗОМ**

Мазкур Низом Ўзбекистон Республикаси «Суғурта фаолияти тўғрисида»ги Қонуннинг 10-моддаси ва Ўзбекистон Республикаси Вазирлар Маҳкамасининг 1998 йил 8 июлдаги 286-сонли «Суғурта фаолиятини давлат томонидан тартибга солиш чоратадбирлари тўғрисида»ги қарорининг 3-бандига мувофиқ ишлаб чиқилган ва суғурталовчининг ижро этувчи органи раҳбарларига ва бош бухгалтерларига қўйиладиган малака талабларини белгилайди.

Мазкур Низом Ўзбекистон Республикаси Ҳукумати қарори билан тайинланган суғурталовчининг ижро этувчи органи раҳбарларига тадбиқ этилмайди.

### **I. Умумий қоидалар**

1. Мазкур Низом мақсадини амалга оширишда қуйидаги тушунчалар қўлланилади:

**суғурталовчининг ижро этувчи органи раҳбари** — қонунчилик ва суғурталовчининг таъсис ҳужжатларига мувофиқ тайинланиши ёки сайланиши натижасида, тузилган меҳнат шартномасига асосан суғурталовчининг ягона ижро этувчи органи бўлиб ҳисобланадиган ёки суғурталовчининг коллегиял ижро этувчи органи устидан бошқарадиган жисмоний шахс;

**суғурталовчининг бош бухгалтери** — суғурталовчининг бухгалтерия ҳисоботи ва молиявий бошқаруви функциясини амалга оширувчи, бухгалтерия ҳисоботини ташкиллаштиришни ҳамда моддий ва молиявий ресурсларни мақсадга мувофиқ, тежамкорлик билан ишлатилишини назорат қилишни таъминлайдиган шахс;

**Давсуғуртаназорат** — Ўзбекистон Республикаси Молия вазирлиги ҳузуридаги суғурта назорати давлат инспекцияси.

2. Суғурталовчининг ижро этувчи органи раҳбари ёки бош бухгалтери лавозимга сайланган ёки тайинланган вақтдан бошлаб 10 иш куни мобайнида суғурталовчи бу ҳақда тўлдирган анкета (мазкур Низомга илова)ни илова қилган ҳолда Давсуғуртаназоратни хабардор қилишга мажбур.

### **II. Суғурталовчининг ижро этувчи органи раҳбарига қўйиладиган малака талаблари**

3. Суғурталовчининг ижро этувчи органи раҳбари қуйидаги талабларга жавоб бериши шарт:

олий маълумотга эга бўлиши;

суғурта соҳасида 2 йилдан кам бўлмаган иш стажига эга бўлиши, шундан суғурта соҳасида бир йиллик иш стажи ушбу лавозимга тайинланиш ёки сайланишдан олдин келиши керак;

4. Суғурталовчининг ижро этувчи органи раҳбари этиб, раҳбар томонидан амалга оширилган ҳаракатлар юридик шахсни банкротликка ёки уни мажбурий тугатиш

тўғрисида қарор чиқарилишига олиб келганлиги бўйича маълумотлар мавжуд бўлган ҳолларда, банкрот деб топилган ёки уни мажбурий тугатиш тўғрисида қарор қабул қилинган пайтгача бир йилдан ортиқ бўлмаган давр мобайнида ҳар қандай юридик шахснинг раҳбари (биринчи шахс) бўлиб ҳисобланган шахс суғурталовчининг ижро этувчи органи раҳбари лавозимига тайинланиши ёки сайланиши мумкин эмас.

### **III. Суғурталовчининг бош бухгалтерига қўйиладиган малака талаблари**

5. Суғурталовчининг бош бухгалтери қуйидаги талабларга жавоб бериши шарт: олий касбий (бухгалтерлик, молиявий, иқтисодий) маълумотга эга бўлиши; 2 йилдан кам бўлмаган бухгалтер иш стажига эга бўлиши.

6. Истисно ҳолларида суғурталовчининг бош бухгалтери лавозимига олий касбий (бухгалтерлик, молиявий, иқтисодий) маълумотга эга бўлмаган шахс, 5 йилдан кам бўлмаган молиявий, бухгалтерлик иш стажига мавжуд бўлиши шарти билан тайинланиши мумкин.

### **IV. Мазкур Низом шартларини бузганлик учун қўлланиладиган чоралар**

7. Агар суғурталовчининг ижро этувчи органи раҳбари ёки унинг бош бухгалтери тақдим қилинган ҳужжатлар бўйича ўрнатилган малака талабларига мос келмаса, Давсуғуртаназорат суғурталовчига кўрсатма олинган пайтдан бошлаб бир ой муддат ичида камчиликларни бартараф этиш тўғрисида кўрсатма беради.

8. Давсуғуртаназорат кўрсатмасида кўрсатилган камчиликлар суғурталовчи томонидан бартараф этилмаган тақдирда, Давсуғуртаназорат ушбу суғурталовчига Ўзбекистон Республикасининг қонунчилигига мувофиқ чоралар кўради.

### **V. Яқунловчи қоида**

10. Мазкур Низомдан келиб чиққан низолар Ўзбекистон Республикаси қонунчилигида ўрнатилган тартибда ҳал этилади.

Суғурталовчининг ижро этувчи органи раҳбарлари ва бош бухгалтерларига қўйиладиган малака талаблари тўғрисидаги низомга  
ИЛОВА

### **Суғурталовчининг ижро этувчи раҳбари ва бош бухгалтери тўғрисида маълумот анкетаси**

#### **Биринчи қисм. Анкетани тўлдириш қоидалари**

Анкета шахснинг ўз қўли билан, тушунарли дастхатда, сиёҳ ёки қора, кўк, бинафша рангли шарикли ручка пастасида тўлдирилиши керак. Ҳамма саналар араб рақамида ёзилиши шарт.

Анкетанинг ҳамма саволларига тўлиқ ва аниқ жавоблар берилиши ҳамда анке-



танинг бирор қисми тўлдирилмасдан қолмаслиги шарт. Ҳеч бўлмаса тўлдирилмай қолган бирор бир қисмининг мавжудлиги, анкетанинг тўлиқ тўлдирилмаганлигини англатади ва у суғурталовчига қайта ишлаш учун қайтарилади. Зарур бўлганда тўлиқ маълумот келтириш учун анкетага қўшимча варақлар илова қилиниши мумкин.

### Иккинчи қисм. Анкета

#### 1. Анкета тўлдирувчининг шахси тўғрисида маълумот

Код	Саволлар	Жавоблар
1.	Фамилияси	
2.	Исми	
3.	Отасининг исми	
4.	Аввалги фамилияси (агар фамилия ўзгарган бўлса)	
5.	Туғилган йили	
6.	Туғилган жойи	
7.	Паспорт рақами ва серияси	
8.	Уй адреси (паспортда рўйхатга олингани бўйича)	
9.	Уй адреси (яшаш жойи бўйича)	

#### 2. Охирги 10 йил мобайнида бандлиги тўғрисида маълумотлар (маълумотлар ҳар бир ташкилот (корхона) бўйича алоҳида берилади)

Код	Саволлар	Жавоблар
10.	Ишлаган даври	___ йил «__» _____ дан ___ йил «__» _____ гача
11.	Бандлик тавсифи (керагини белгиланг)	а) меҳнат шартномаси бўйича; б) яқка тартибдаги тадбиркор; в) ишламаган; г) кундузги ёки сиртки бўлимда ўқиган.
	«б», «в» ёки «г» жавоб бўлганда батафсил кўрсатинг	
12.	Ташкилот (корхона) номи	
13.	Сизга маълум бўлган ташкилот (корхона)нинг охирги манзили	
14.	Лавозим (лавозимлари)	

#### 3. Таълим бўйича маълумотлар

(фақат олий ўқув юртидаги таълим кўрсатилади, ҳар бир ОЎЮ бўйича алоҳида)

Код	Саволлар	Жавоблар
15.	Олий ўқув юртининг номи	
16.	Ушбу ўқув юртининг анкета тўлдирувчига маълум бўлган охирги манзили	
17.	Таълим олиш шакли (керагини белгиланг)	а) кундузги; б) сиртки; в) кечки.

Код	Саволлар	Жавоблар
18.	Қирган сана	
19.	Ўқишни яқунлаган сана	
20.	Олган даражаси	
21.	Олган мутахассислиги	
22.	Ўқишни тамомлаганлик тўғрисида диплом ёки бошқа ҳужжат серияси ва рақами	Серияси _____ Рақами _____
23.	Агар анкета тўлдирувчи ушбу ОЎЮда ўқишни тугатган бўлмаса, сабабини кўрсатинг	

**4. Анкета тўлдириш вақтида анкета тўлдирувчининг эгаллаган лавозими тўғрисида маълумот**

Код	Саволлар	Жавоблар
24.	Суғурталовчи номи	
25.	Суғурта фаолиятини амалга ошириш учун суғурталовчи лицензияси серияси ва рақами	
26.	Анкета тўлдирувчининг тайинланган ёки сайланган лавозимининг тўлиқ номи	
27.	Сайланиш ёки тайинланиш санаси	
28.	Анкета тўлдирувчига мажбуриятлар юклатилган лавозимнинг тўлиқ номи	
29.	Мажбурият юклатилган сана	

**5. Қўшимча маълумотлар**

Код	Саволлар	Жавоблар
30.	Анкетани тўлдирувчи раҳбар томонидан амалга оширилган ҳаракатлар юридик шахсни банкротликка ёки уни мажбурий тугатиш тўғрисида қарор чиқарилишига олиб келганлиги бўйича маълумотлар мавжуд бўлган ҳолларда, банкрот деб топилган ёки уни мажбурий тугатиш тўғрисида қарор қабул қилинган пайтгача бир йилдан ортиқ бўлмаган давр мобайнида ҳар қандай юридик шахснинг раҳбари (биринчи шахс) бўлиб ҳисобланганми (керагини белгиланг)	а) бўлмаган б) бўлган
	«б» жавоби белгиланган ҳолда, ташкилот номи ва анкета тўлдирувчининг лавозимини кўрсатинг	

— ушбу анкетада келтирилган маълумотлар ҳақиқий ва тўғрилигини; — ушбу анкетани тўлдириш қоидалари билан танишганлигини тасдиқлайман	
Анкета тўлдирувчининг тўлиқ фамилияси, исми, отасининг исми	
Анкета тўлдирувчининг имзоси	
Имзо санаси	

Анкета тўлдирувчи менинг ҳузуримда анкетанинг ҳар бир варағини ўз қўли билан имзолаганлигини тасдиқлайман	
Суғурталовчининг жавобгар шахсини тўлиқ фамилияси, исми, отасининг исми	
Суғурталовчининг жавобгар шахсини имзоси	
Имзо санаси	

М.Ў.

ЎЗБЕКИСТОН РЕСПУБЛИКАСИ ОЛИЙ ВА ЎРТА МАХСУС  
ТАЪЛИМ ВАЗИРЛИГИ  
ЎЗБЕКИСТОН РЕСПУБЛИКАСИ МОЛИЯ ВАЗИРЛИГИНИНГ  
ҚАРОРИ

**184 Олий таълим муассасалари талабаларига стипендиялар тайинлаш ва тўлаш тартиби тўғрисидаги йўриқномани тасдиқлаш ҳақида**

*Ўзбекистон Республикаси Адлия вазирлиги томонидан 2004 йил  
16 апрелда 1339-сон билан давлат рўйхатидан ўтказилди*

*(2004 йил 26 апрелдан кучга киради)*

Ўзбекистон Республикаси Вазирлар Маҳкамасининг 2001 йил 17 августдаги «Олий ўқув юртлари талабаларига стипендиялар тўлаш тартиби ва миқдорлари тўғрисида»ги 344-сонли қарорининг 3-бандини бажариш мақсадида Ўзбекистон Республикаси Олий ва ўрта махсус таълим вазирлиги ва Молия вазирлиги **қарор қилдилар:**

1. Олий таълим муассасалари талабаларига стипендиялар тайинлаш ва тўлаш тартиби тўғрисидаги йўриқнома иловага\* мувофиқ тасдиқлансин.
2. Ушбу қарор Ўзбекистон Республикаси Адлия вазирлигида давлат рўйхатидан ўтказилганидан сўнг, 10 кун ўтганидан кейин кучга киради.
3. Ушбу қарор кучга кирган кундан сўнг, қуйидаги йўриқномалар ўз кучини йўқотган деб ҳисоблансин:

Ўзбекистон Республикаси Олий ва ўрта махсус таълим вазирлиги ва Молия вазирлигининг 2002 йил 14 январдаги 1-П, 13-сонли «Таълим муассасаларида стипендия тайинлаш ва тўлаш тартиби тўғрисидаги йўриқномани тасдиқлаш тўғрисида»ги қарори (2002 йил 6 март, рўйхат рақами 1104-сон — Меъёрий ҳужжатлар ахборотномаси, 2002 й., 5-сон) ва Ўзбекистон Республикаси Олий ва ўрта махсус таълим вазирлиги ва Молия вазирлигининг 2002 йил 20 августдаги 4-П ва 100-сонли «Таълим муассасаларида стипендия тайинлаш ва тўлаш тартиби тўғрисидаги йўриқномага киритилган ўзгартиришлар тўғрисида»ги қарори (2002 йил 29 август,

\* Илова рус тилидаги матнда берилди.

рўйхат рақами 1104-1-сон — Меъёрий ҳужжатлар ахборотномаси, 2002 й., 15-16-сон).

**Олий ва ўрта махсус таълим вазири С. ФУЛОМОВ**

Тошкент ш.,  
2004 йил 10 март,  
2-П-сон

**Молия вазири М. НУРМУРАТОВ**

Тошкент ш.,  
2004 йил 10 март,  
43-сон

**Ўзбекистон Республикаси**  
**Адлия вазирлиги маълум қилади:**  
**вазирликлар, давлат қўмиталари ва идораларининг**  
**умумий мажбурий тусдаги меъёрий ҳужжатларини давлат**  
**рўйхатидан ўтказиш ҳолати тўғрисида**  
**2004 йил 10 апрелдан 16 апрелгача бўлган маълумот**

**I. Давлат рўйхатидан ўтказилди:**

1. «Давлат улушларини бошқариш бўйича кўрсатилган хизматлар учун тўловларни амалга ошириш тартиби тўғрисидаги низомга ўзгартириш ва қўшимчалар киритиш ҳақида» *Ўзбекистон Республикаси Молия вазирлиги, Давлат мулки қўмитасининг 2004 йил 4 мартдаги 38, 01/06-04-сон қарори.*

*2004 йил 12 апрелда 1262-1-сон билан рўйхатдан ўтказилди (2004 йил 22 апрелдан кучга киради).*

2. «Нақд чет эл валютасида операцияларни амалга ошириш қоидаларига ўзгартириш ва қўшимчалар киритиш тўғрисида» *Ўзбекистон Республикаси Марказий банки Бошқарувининг 2004 йил 21 февралдаги 474-1-сон қарори.*

*2004 йил 15 апрелда 957-1-сон билан рўйхатдан ўтказилди (2004 йил 25 апрелдан кучга киради).*

3. «Тижорат банклари томонидан фермер хўжаликларига бўлғуси ҳосилни гаровга олган ҳолда кредит бериш тартиби тўғрисида низомни тасдиқлаш ҳақида» *Ўзбекистон Республикаси Марказий банки Бошқарувининг 2004 йил 1 мартдаги 563-сон қарори.*

*2004 йил 16 апрелда 1337-сон билан рўйхатдан ўтказилди (2004 йил 26 апрелдан кучга киради).*

4. «Суғурталовчининг ижро этувчи органи раҳбарига ва бош бухгалтерига қўйиладиган малака талаблари тўғрисидаги низомни тасдиқлаш ҳақида» *Ўзбекистон Республикаси Молия вазирининг 2004 йил 25 мартдаги 52-сон буйруғи.*

*2004 йил 16 апрелда 1338-сон билан рўйхатдан ўтказилди (2004 йил 26 апрелдан кучга киради).*

5. «Олий таълим муассасалари талабаларига стипендиялар тайинлаш ва тўлаш тартиби тўғрисидаги йўриқномани тасдиқлаш ҳақида» *Ўзбекистон Республикаси Олий ва ўрта махсус таълим вазирлиги, Молия вазирлигининг 2004 йил 10 мартдаги 2-П, 43-сон қарори.*

*2004 йил 16 апрелда 1339-сон билан рўйхатдан ўтказилди (2004 йил 26 апрелдан кучга киради).*

**II. Давлат реестридан чиқарилди:**

1. Таълим муассасаларида стипендиялар тайинлаш ва тўлаш тартиби тўғриси-

даги йўриқнома, 1-сонли ўзгартиришлар. *Ўзбекистон Республикаси Олий ва ўрта махсус таълим вазирлиги, Молия вазирлиги томонидан тасдиқланган (06.03.2002 й., рўйхат рақами 1104-сон; 29.08.2002 й. рўйхат рақами 1104-1-сон).*

*Адлия вазирининг 2004 йил 16 апрелдаги 91-мҳ-сон буйруғи билан реестрдан чиқарилди.*

**Мазкур ҳужжат амалдаги қонунчиликка ўзгартиришлар киритилиши ва янги норматив-ҳуқуқий ҳужжат қабул қилиниши муносабати билан давлат реестрдан чиқарилди.**

### **III. Давлат рўйхатидан ўтказилиши лозим эмас:**

1. «Маиший-рўзғор чиқиндиларини ташиш қоидаларини тасдиқлаш тўғрисида» «Ўзкоммунхизмат» агентлиги Бош директорининг буйруғи.

2. «Ўзбекистон Республикаси фуқаро авиациясининг ҳаво ҳаракатларини ташкил этиш ва унга хизмат кўрсатиш» Авиация қоидаларини тасдиқлаш ҳақида» Парвоз хавфсизлиги назорати бўйича *Ўзбекистон Республикаси Давлат нозирлиги бошлигининг буйруғи.*

**Мазкур ҳужжатлар Адлия вазирлиги билан келишилган ҳолда техник ҳужжатлар деб топилди. Улар белгиланган тартибда кўрсатилган идоралар томонидан тасдиқланиб, кучга киритилиши мумкин. Давлат рўйхатидан ўтказилиши лозим бўлмаган меъёрий ҳужжатларда амалдаги қонун ҳужжатларига зид қоидалар бўлмаслиги лозим.**